

مَكَايَاتُ

نُورُ سَطَا الْجَيَابِلِ بِالدَّرِيِّمِ

الْعِيَّاشِي ثَابِت

الكتاب: نوسطألجيا بؤدبؤة

المؤلف: العياشي ثابت

تقديم الناقد: حمادي تقوا

رسومات الفنان: العوني الشعوبي

والفنانة : بهبجة بنار

خطوط الفنان: عبد العزيز مجيب

الطباعة : الجديدة روبرو

النشر: منتدى الصحافة والإعلام الإلكتروني بسبيدي بنور

الطبعة : الأولى

رقم الإيداع القانوني: 2018MO 3969

ردمك 978-9920-36-339-6

...

## مع بصمة الفنانين:



الخطاط عبد العزيز مجيب



الكاريكاتوريست العوني الشعبي



الفنانة بهيجة بنار

# إهداء

إلى روح والدتي التي كابدت العناء، وقاومت قساوة الزمن الماضي من أجل أن أكون وإخوتي...

إلى روح والدي الذي غصّت رئتاه بغبار الحقول، وشق الصخر كي يطعمنا صغارا، ويلهمنا كبارا...

إلى كل الربوع البدوية التي صنعت، عبر التاريخ، قاموسا خاصا بها، وتنهدت إزاء تواريه شيئا فشيئا...

وإلى كل من أحب "نوسطالجيا بلدية"، ودعا إلى تجميعها في كتاب

« « « « « « « « « «



## نوسطالجيا بُدّية: 1


فاش كنت صغير، كان عندي عطف خاص على الحيوانات، كنت كنبقى مشطون واش الكلب المربوط كال و شرب، واش المشيشة لي والدة خمسة و كترضعهم كالت و شربت، واش البهايم وردو و شبعو ربيع... ومن كثرة التّسوال كانت الوالدة الله يرحمها شي مرات كاتكول ليا: سير ديهها في قرابتك... وانا كان أسعد حاجة عندي نهار نهز الكادومة والكفة ديال الدوم، و نمشي نحش الربيع للبقرة ديالي. كانوا متافقين معايا بلي البقرة ديالي، ونهار باعوها ماكالوهاش ليا، حتى بدينا ناكلو في الفول والحمص ديال السوق، عاد خبروني، وباقي نعقل وحلت ليا في القرجوطة فاش سمعتها. المهم كانت رحلة البحث على الربيع للبقرة ممتعة، كنت كنتحاور مع الزنيكة، ونتخير في الربيعات لي نجمع، كانت الحلّية

والنّقلة والكرّنية وشوال الخروف هوما المفضلين عندي، وماكانش عندي مع الحميضة حيتاش كانت البكرة ماتكّطعش فيها بزاف، وماكانش عندي مع الكلكاز حيتاش كان يدير بنة خايبة في اللبن والزبدة... وكنت كانكول مع راسي علاش هاذ الأنواع كلها ديال النبات، مأكلة وحدة ولا زوج كاع كافية، حيتاش حنا كنا كناكلو غير الخبز واتاي، ومرة مرة كنفورو بادّاز ومن السوق للسوق عاد نديرو المرققة باللحم. الحاصل كان تايبان ليا بلي البقر مبرع مع راسو في الانواع والأشكال... ، كنت كبرت شوية، ونقص البقر من الدوار ، وحقدت على الكلاب لي 7 فرسوا كثر من النص في البهايم، وكثرو حتى ولاو غا دايعين... وكثر بنادم، وكثرت من بعد أنواع المأكولات والمشروبات، عاد فهمت... حيتاش تكّاد بنادم في الأنواع ديال المأكلة مع البقر... الحاصل عمّر الواحد مايحسد البهايم فماكلتهم...

## نوسطالجيا بُدّية: 2

كان خويا الصغير ديما تابعني شاد من وذن الكّفة، وداير بحال " الكوبيلوط" تايوريني في الأنواع ديال النبات، خويا ها النقلة، خويا ها ربيانة، خويا ها ريك الحنش... وانا داير فيها خبير كنقمعو مرة مرة ونكول ليه: اسكت اصاحبي اش فهّمك في الحشيش (النبات ماشي لآخر)... كاخليني ، يطلق من الكّفة ويتم غادي غضبان، وتانبا نعيط ليه: صافي غا ارجع نعطيك الكّادومة حش بيها لي بغيتي. وكيرجع مسكين. كتعمر الكّفة، كنهزوها بيناتنا ونرجعو... من بعيد، كايانو ليا العيالات جالسات كدام الخيمة ، جارتنا كتقلي لبنتها فراسها، ومي كتغزل الصوفة ، والوالد حدا الكّاعة مقابل النادر ديال التبن، وحدها البغل تا ياكل السفساف. فاش تقرب ليه تايدير براسو ماشافنيس، وتانكول ليه: بّا ، وابّا جبت غا النقلة والكّرنية ياك مزيانين للبقرة؟ كايثلافت لهيه ويكول ليا: راك مهلي غا في بقرتك... نهار باعها ماعطاني حتى صولدي... كانخليوه ونمشيو جهة العيالات، تايدوا يضحكو ويكولو: ماعندي مانتسالكم، هاكا نبغيكم... وكنا كنفرحو. ولكن الفرحة الكبيرة كنت كنشوفها في عين البقرة وهي كاتشوف الكّفة عامرة، وحنا جايين عندها كانت تزوك تزويكة ملهوفة، ماشي بالجوع ولايني حيتاش عارفاني كنختار ليها النقيات الزينين ديال الحشيش... كنا تانوگفو كدامها وهي تاكل، إحساس زوين بلذة النبات، وحنا تا نشوفوها وهي تاكل... كانوا عندنا قبل الجفاف ربعات البقرات، وكنت نعطي للثلاثة الاخرين شوية شوية، نخافهم يطرحو... وكان الجفاف ديال 81 و82 خايب بزاف، ما ذبحناش عامين متابعة، ونهار العيد ذبحنا بيبي كحل بحال كّاع القبيلة... كان ابتلاء صعيب، ضياق فيه الحال، ومشات الفرحة لي كنت نشوف في عينين مّي، وعينين مي فاطنة، وعينين البقرة، وتزادت عداوتي مع الكلاب لي ما بقاتش ترحم البهايم، وهي لي كانت يا حسرة حاضياها من الذيب...





هي حُرُوفٌ...

هي صُرُوفٌ...

هي كُلمةٌ واخلةٌ فِ الجُوفِ

هي مُعاندةٌ ما بُغائشُ ثُرُوفِ

### نوسطالجيا بلدية:3

رجل عمتي كنا نعيطو ليه "خي عامر" ، من نهار عقلت عليه الله يرحمو ما بدل من رجلي  
'الكرّك' كيصايبو ببو من بُنو ديال الرويدة. ديما تانشوفو مقرّد، ركابيه عند فمو وظهرو  
متكي على سطارة، تايمي فافوريت. قالت لينا عمتي شي مرة : خيّا عامر خرجو عليه  
زوج حوايج، التويزة بلا ريال بلا جوج، والسبسي . كنا صغار كندورو بيه باش يعاود لينا  
قصة بريغتان ، حكاها لينا شي مية مرة وما مليناهاش. حفظناها، ولايني كنا نبغيو نسمعوها  
منو. فاش يسالي كان يجبد من جيبو كويغط صغير، ويعطينا فنيدة وحدة للواحد ديال المكانة...  
خي عامر كان عندو كلب مسميه ريكس، على سمية گاوري كان خدام عندو في ايامات  
الاستعمار. وكنت كانسمعو 10اشي سالي حكاية بريغتان، كيبدا يعاود للوالدة وعمتي ومي  
فاطنة على الكاوري كيفاش كان كيعاملهم بقسوة، كايخدمو النهار كامل من طلوعها لغبورها،  
تاكيروحو مسالين، ولي دار شي فالطة ييات في الخلا حدا النادر... وكانت عمتي تقول ليه:  
هادشي كامل ومسمي الكلب على سميتو... وكانوا تايضككو وحتى هو تايضكك ويحك راسو  
باطفارو الطوال. واحد النهار الواليد الله يرحمو جاب من المدينة كلب كبير، اعطاه ليه  
يهودي كان في الملاح، بغى يمشي في حالو للخارج، كان الكلب تايلع ، يدير ثلاثة من  
ريكس، والغريب كانت سميتو توريسك. المهم نهار ريكس سخن عليه راسو مشى جهة  
توريسك، وهو يقجو حتى صفاها ليه. كنت كنظن بلي خي عامر غادي يتقلق ويبكي على  
كليبو، الساعة فاش قلت ليه تورسك قتل ريكس، ضحك وقال ليا: هاذوك غا كلاب... عاد  
فهمت علاش كان مسمي كلبو ريكس... من ذاك النهار، ما بقاش تايبغي يعاود لينا قصة  
بريغتان، وتايدخل ديريكيت في الحديث مع العيالات على توريسك، تايقول ليهم حضيو معه  
لا يعود ياكل ليكم الدجاج...وزيرو ليه الربطة مزيان. واحد النهار فقنا مالفيناهاش، كيدار  
حتى فك راسو؟ الله اعلم. المهم قالت مي صافي تهنيينا منو. مع الربعة ديال العشية وحنا  
باركين قدام باب الخيمة، تايبان لينا جاي، فمو فيه أثر الدم. تخلعنا، وحتى حد ما قدر يدوي  
معه. داز لبلاصتو فين كان مربوط، حتى جا الواليد وربطو. الحاصول عاد كل أحد يصبح  
غابر، يقطع القنبة بسنانو ويمشي حتى للعشية ويرجع. من بعد عرفنا بلي كان كايمشي لسوق  
الحمرة، كيبقى في الكرنة حتى يعركها ويجي. حاجة ما قدرتش نفهمها إلى يومنا هذا، وهي  
باش كان كيصرف نهار الاحد، خصوصا أنه كيمشي في الليل يعني قبل مايبداو الشفناجة  
يطيبو ، باش ماتقولوش ليا كان كيشم ريحة الزيت من بعيد

## نوسطالجيا بلدية:4

جارنا عباس كان والد 12، وحننا كنا 8، لعبانة وحدة ديال الصوف كنفر شوها من الراس للراس، ومنتستفو بحال القبور، الكنتف على الكنتف والكعب على الكعب، الدراري في جهة والدريات في جهة... كنبقاو نهضرو ونضحكو على الجهد، حتى الوالد كيطلع ليه الدم، وكيهز البوردو ويدق علينا زوج دقات من الشرحم لي بين البيوت، الدقة الاولى إنذار، والثانية كنجمو، حيتاش ايلا بقينا مصدعينو غاينوض... الصباح كلشي كينوض، لي تشطب في المراح، ولي ينكس الكوري، ولي يخرج البهايم، ولي يحش كلاس، ولي يحتيو على العتلة ويتبعو الوالد يكربلو الذرية... اولاد عباس كذلك... كلشي يظل يجري، كايتمعو مع الغذاء، والغذا في الغالب إما صيكوك وإما ربعات الخبزات ديال الفراح كتنقسمهم الأم، وكايجلسو كل واحد فبلاصتو، تفرق عليهم الشدوكا، وتعطيهم كاس ديال اتاي، وفاش يكملو، تايقول ليهم الوالد، كلتو شربتو وبهايمكم... كل واحد كايجمع النوضة ويزيد. الحاصل كلشي ضارب تمارة. فاش تسالي التحرير وتجي القراية كنفرح حيتاش غانبعد من تمارة، كلشي كايتهلى فيا، وفاش نشري الأدوات كاع خوتي وخواتاتي كيتجمعو عليا، وكنبدا نقلب في القراءة ونقرا العناوين، كل نهار كاندير هاذ العملية حتى حفظوهم وولاو يتسابقو معايا: أحمد والعفريت، سعاد في المكتبة، الصندوق ذو العجلة الحمراء... نسالي كنجد الليفر تاهو...




كانَ فُطُورُنَا  
كانَ عُذَانَا  
كانَ عِشَانَا  
أتايَ النُّسْرُ  
وَسُكَّرَ الجُرَانَة

## نوسطالجيا بلدية:5

...balimako, esperantos va au marche, la chèvre de mr Seguin...  
خويا الصغير كان حافظ العناوين بالفرنساوية غير بالسمع، قبل ما يدخل للمدرسة ويخرج من التحضيرى ، حلف هو لا مشى وخا عطاوه قتلة ديال العصا. وفي الدوار هو لي عطى كنيات جديدة لشي وحدين، باليماكو، سبيرانطوس، لاشيفغ... وهو كانو يعيطو ليه لاسيكون، حيثاش طويل بحال بلارج لي مصور في القرعة القديمة ديال المونادا. علاقتنا بالتصاور كانت علاقة غريبة ، ماكانتش كتتعدى التصاور ديال القراءة والليفير، وديال المواد الغذائية في الحانوت ديال ولد علي، صورة النمر في قالب السكر، صورة الجرانة، صورة الكيكس ، صورة قرطاس الشمع... الباقي كلو كان مباشر: منجج كيسديوه العيالات، يوقفوه، يكرجوه، تاغنجة يطلبو بها الشتا، الدور ديال الطلبة، الزردة ديال الشيخ ، العيالات دايرين بالعطار يشريو من عندو الحوايج والحلقات ومراود الكحل وشقفة العكر والسواك... الخراز لي كان كايجي من شهرين لشهرين كيبنى كيطون حتى يصايب كاع الصبايط والركوات والدلا ديال الما والبرادع... والمعاشي لي كان يسبب للجهل ( السعار) ... وعبيدات الرمي لي تايجيو مرة في العام يباتو مقصرين مع اولاد الدوار حدا الجامع، والفقيه لي كا يعيى ما يجري عليهم وفي الأخير كيسد عليه ويبقى يتصنت، وفي نص الليل كايتم جاي مخنزر، حتى يجروه عاد يجلس حدا الشيخ... والقمارا لي كيباتو حدا النخلة حتى يصبح الحال...

## نوسطالجيا بلدية:6

مي الله يرحمها كانت دايرة بحال بيت الخزين، كتبغي تعطيني الفلوس شقفة باش نجيب شمعة من الحانوت، كتجدهم من لاستيك ديال الركبة، كاتبغي تجبد ورقة ديال مية ريال من فلوس الفروج كتجدها من كاشوشها، كتجي عندها مي فاطنة على وقيدة، كتجدها من نواظرها...ودايرة فوق هادشي صندوق بساروتها كتخزن فيها السكر، حيتاش كنت انا وخويا كنعطيوه صلية... عيالات الجيران كلشي يتصارفو بيه، الدكيك، العطرية، الملح، الوقيد، الخميرة البلدية، الماء، الكدي، كلشي... ويلا ما كانش الوقيد كاتمشي للكانون تعطيها عوفية... فاش كايجي شي ضيف، كتسمع الدجاج يقاقي، كتعرف بلي الوالدة تابعة شي فروج وكتعيط عليا نذبجو. النهار الاول فاش ذبحت عتوكة، كنت خايف، ومابغيتش، لكن مي فاطنة قالت ليا: إيوا راه كاين غير انت لي راجل، كلشي خارج خدام... شديت الموس ودوزت عليها حتى بقى عنقها في يدي، والدجاجة في يد امي. ما دواتش مي، ولايني مي فاطنة دارتني ضحكة، أمالك أوليدي محلف عليها! المهم... قضاييت الغرض.



صَنْدُوقٌ مَغْلُوقٌ

وَزُنْبِيلٌ هَبِيلٌ

السَّعْدُ مَشْفُوقٌ

وَالْكَلامُ يُسِيلُ...

النُّهَازُ مَجْبُودٌ

وَاللَّيْلُ طَوِيلٌ...


## نوسطالجيا بلدية:7

بالنسبة للعيالات، العطار كان هو الصندوق الأسود، ايلا تفر كعت الأسرار يعرفو بلي هو لي قالها. كان كايبيع ويشري ف كلشي، حتى في توصل الرسائل بين العيالات، وحدة كتقلب لولدها الكبير على امراة، عيالات الدوار مابغات تاوحدة تعطيها بنتها، كتسول العطار يشوف ليها شي وحدة اخرى في دوار آخر... وحدة وصاتها الشوافة تجيب ليها فارة الخيل ... وحدة بغات تزوج بنتها البائرة توصي العطار ايلا كان شي عريس واحل... المهم العطار كان عليه واحد الإقبال كبير. غير يسمعه العيالات يخلو لي في يديهم ويخرجو. وتايبيع ليهم حويجات مرة بالفلوس مرة بالزرع والبيض ومرة بالكريدي حتى يرجع... حنا صغار كان كيبان لينا العطار بحال شي بنادم غريب مايشبهش للرجالة الاخرين. خصوصا فاش كنا نسمعو الرجالة داوين عليه ، كتحسو بيهم عايقين به ومخلينو ملاهي العيالات. وخا شي مرة عباس دار فيه وقال ليه: أجي انت أش كتبيع للعيالات؟ جاوبو العطار: أنا عطار كنبيع العطرية. وهو يقول ليه: وهاذيك فارة الخيل لي كتجيب كنديروها في المسمن؟ الله يلعن لي مايحشم... بدا العطار يضحك وقال ليه: راه غير طلباتني عليها فلانة بغاتها للشوافة... كتعيد السحور...



## نوسطالجيا بلدية:8

وحننا صغار كنلعبو مع بعضياتنا، كنا بحال شي مخلوقات عجيبة، بحال داكشي ديال أفلام الكرتون، أنا كانت عندي جلابة مقزبة خضراء، وكنت كنصلع راسي، حيتاش الوالد كيغتنم الفرصة ديال وجود بّاصليان ، لي كان يجي يكرط ليه، وكايدوّزني معه... خويا الصغير تريكوه ديما ناقص من الكمام، وسروالو طايب من الركابي حيتاش كيلعب البيّ، ولد عباس ديما مضارب مع نيوفو، وعندو كرن في الجهة اليسرى من راسو، ملصقة فيه مو ودعة أو لوبانة، قالت لك خايفة عليه من العين، وفاطمة بنت عباس مشعككة، وديما مصدعانا باغا تلعب عروسة وعريس مع خويا الصغير، وكنا كنديرو ليها خاطرها، ونديرو ليهم العرس، وخا خويا كنت حاس به ما حاملهاش، ولايني كان صابر حيتاش كانت شاطاماطا، كتضارب مع الدراري... ولد عباس لآخر كان عفريت في الطرومبية، شحال من واحد قسم ليه طرومبيتو، ما طهروه حتى ولى يلبس في رجليه 42 ، باقي نعقل نهار العرس عرفوه غايهرب، كتفوه بقنبة حتى جا الحجام، أنا بقى فيا حيتاش شفتو كيبيكي من نيتو. ملي شاف الحجام، سمعناه يعرعر بحال شي رجل. الغد ليه، كان حاتي على كمشة ديال الربعاوات والعشروات، ويدور حدانا بحال شي ثور سمين... هو الاول لي كان كيبيدا لينا اللعب، كي شفتي كان كل لعبة بوقتها، ايلا صبت الشتا نلعبو بليدة بالوتد، ومن بعد يجي وقت البي، ومن بعد الطرومبية، ومن بعد السيس، وفي العواشر كل واحد يشري لعبة، أما كابوس ديال الفرشي ولا كابوس ديال الحراقية واما كاميو ولا مش عندو كرة لكدام... أنا ماكنتش نعرف كيفاش ولد عباس كي عرف الوقت ديال كل لعبة...



بِالْكَادِمَةِ وَكُفَّةِ الدُّومِ  
كُنْتُ نَفَاجِي سَلًا هُمومِ  
نُنْبَعِ الحُدودَا  
وَطَرِيقِ مَشْدودَة  
بِخِيوطِ العُكَالِ...

## نوسطالجيا بلدية:9

المنجج كان بالنسبة ليا شيء مقدس، عندو طقوس خاصة، كتحرص الوالدة وجاراتها على احترامها من الاول. تا تصيفط اختي الكبيرة تشطب البلاصة فين غا يسديو، كاتجي مي فاطنة هازة ماسيطة واوتاد، كاتعبر المسافة القانونية وتذك الاوتاد، مي كاتجيب هي واختي الخشبات كيحطوهم في البيت، وكتبرك مي في جهة ومي فاطنة في جهة أخرى وتاتبدا عايشة تجري عليهم ، يعني كتوصل السدا من وحدة لوحدة، وفين ماتوصل عند الوحدة تمد ليها الخيط ، تلويه على الوند وتمدو ليها، حتى يكمل التسدية. وفين ما داز شي حد كيطلبو منو بياض المنجج. ذاك الساعة كتبدا عملية دقيقة بزاف، حيثاش تايدخلو الكصبات في بلاصة الوند لي في الوسط، وتايؤيو التسدية ويهزوها للبيت فين غا يوقف المنجج. كنت كنسمعهم ديما يدويو على روح المنجج خايفينها تزهب. وكانوا يصليو على النبي كل مرة ، المنجج تايوكف على زوج وقاقف، وخشبة لفوق يلويو فيها السدا وخشبة لتحت يلويو فيها المانطة من بعد النجيج، وفاش يوقف المنجج بعد حرص شديد، كا يوجدو الطعمة لي غا ينجوها، وتاييدوا ينججو وهو ما تايغنيو ذيك الأغاني ديال العراسات. وفاش تيبان الطرف الاول منجوج، كايديرو العضادات باش ينكضوه. المشط باش كينجو كان فيه حلقات ديال الحديد باش ماتكونش الضربة صمكة، كتسمعيه بحال نواقس العود في التبوريدة. كنت كتحس بنشوة كبيرة فاش كتسمح ليا مي ندخل للمنجج، وتعطيني خيط ديال الطعمة ندخلو بين السدا، ونهز المشط ونخبطو باش يتقاد مع خوتو. غير شوية وكتجري عليا، ولايني فاش ما كتكونش كندير ما بغيت. المنجج كان تقريبا ديما عندنا في البيت، يحيد واحد يوقف لآخر، مرة لعبانة، مرة جلابة، مرة حندير... وهادشي ماكانش ساهل، تايجي من بعد مجهود كبير كيديروه العيالات مع الصوفة ديال الحولي والصوفة لي تا يشريو من السوق، تايغسلوها وينشفوها ويغزلوها ويديرو ليها الكبريت ويكبوها في المكب... الحاصل كان عندنا مصنع للنسيج تقليدي كيحقق لينا الاكتفاء الذاتي من الفراش والغطاء وحتى اللباس... كنت كتحس بلي مي لي كتفرش ليا وتعطيني ماشي شركة ديال المانط

## نوسطالجيا بلدية:10

كانت الوقت صعبية في العروبية في السبعينات، خصوصا فاش الشتا كتبقى تصب شهور متابعة، العيالات كيتمحنو في الحطب، ايلا ما كانواش جامعينو في الصيف، كيولي مشكل كبير، حيتاش كانت البوطة مزال ما وصلاتنا، نهار شرينا بوطة صغيرة كان إنجاز كبير، كلشي كان كيطيب من قبل على الفاخر أو الحطب، وكانت الماكلة بنينة، عمرني مانسيت البنة لي كانت في الخبز ديال الشعير طايب في الفراح وفوق منو زكة ديال الحديد، كايدنيو عليه العافية من تحت ومن لفوق... وهاذ الطريقة كتاكل الحطب، هادشي علاش كانت مي كتديرها غير في الحال سخون، أما الشتا ماكانتش تزعم على الحطب... وتصوروا معايا وحدة فايقة في نص الليل، والشتا خيط من السماء، وكتشعل العافية بالهيشر باش تطيب الخبز في الفراح، وتيقنا للسحور... كان صعب مع البرد تحافظ على الشمعة شاعلة، كتضطر تمشي في الظلام حتى للكشينة عاد تجبد وقيدة من ناظرها وتشعل الشمعة، وتشعل العافية تحت الفراح، وتعاود تظفي الشمعة باش تحافظ عليها... وكثير المرات لي مايكونش الشمع، وكتصايب فتيلة بالزيت في جبانة مقلوبة... ونهار شرا الواليد بوطة ولا مبة من بعد كانت نفلة كبيرة فحياتنا، والنهار الخايب فاش يتقاضى الغاز منها، ولا تنهرس الزاجة... أكفس حاجة عندي، كانت هي نهار العومان في 'الحمارة' بتشديد الميم، وهي عبارة عن حمام، ثلاثة ديال الاعمدة، وفوق منهم لعبانات، وتايدخلو ليه مجمر ديال الاعواد باش يسخن، كندخل ليه كاتضيق نفسي، بحال ايلا داخل لجهنم، وكنبدا نقلب على الضو منين يدخل الهواء، والدوزان باش نحك حجرة حرشة، وكنغسل راسي بتيد ولا صابونة حمراء، وماكنخرج من تما حتى كيغفر ليا الله الذنوب لي باقي ما ارتكبتها، وفاش نخرج كاتحط عليا الوالدة لعبانة ثقيلة وتعطيني كاس ديال اتاي مشحر، وكتعيط على الضحية الموالية... ماعرفتش علاش انا وخويا مكنحملوش 'الحمارة' والدرجات مكانش عندهم مشكل... فاش دخلت أول مرة لحمام في الفيلاج، حسيت بلي اولاد العروبية كيغانيو

المشط


شَحَاااااااا اَخْبَطُ  
فِينَا هَاذُ الْمَشْطُ  
وَحْنَا مَنجَجُ بَرُوخُ  
مُسْرُحْنَا شَرُوخُ  
وَدَائِرُ لِينَا... غَضَادَاااااااا

## نوسطالجيا بلدية:11

فاش كنت في القسم الثاني، كانت كتعجبني ريحة الرماد في الكشينة، مافيه باس الواحد يعترف بشي غرايب ماتدخلش للدماغ، كان الطباشير كايجيني بنين، كناكل شي طبشورة ولا زوج في النهار، وحتى الفاخر كان يعجبني مذاقو، وكندوز للمجرم نلحس شوية الرماد... نهار حصلني الوالد عطاني كلخة د العصا، وبدا يغوت، واش ما لقيتي ما تاكل، ها الحليب ها اللبن ها الكرموس ها الباكور، ها بوكليب .... واش باغي تدبر على شي مرض. من تما بعدت على داكشي . كانت مي كتجمع البيض من بيت التبن، ومن العشة ديال الدجاج من الصباح للصباح، وفاش كاتحس بشي حاجة ناقصة، كتعرف بلي شي دجاجة ولات تبيض في الضرك، وهنا كايجي الدور ديالي، كتدير شي خيط طويل في رجل الدجاجة المشكوك فيها، وكتقول ليا تبعها من بعيد ويلا لقيتي فين تبيض نسلق ليك بيضة ونعطيك ربعة ريال. كانت مغامرة مسلية بالنسبة ليا، وغالبا كنت كنلقى البلاصة فين كتبيض، شي مرات كنلقى حضانة ديال البيض، وكنرجع فرحان بالاكتشاف ديالي. حتى الدجاج فيه التشيطين، يخلي على البيضة الخامجة لي حاطين ليه، ويمشي يقرب على محبيضة اخرى. العقوبة ديال الدجاجة لي بدلت المحبيضة كاتكون هي الرباط بقنبة ركيكة، لمدة قصيرة، حيتاش ايلا بقات مربوطة كتتفر، وماتكرش. الدجاج بوحدو عالام، كيظل سارح ويرجع مع العشية كاتعمر ليه الوالدة المحكن فاش يشرب، والمحكن كان حجرة كبيرة غارقة من الوسط، و كاترش ليه الزرع، شعير في الغالب، باش كيتعشى وينعس مع المغرب، الدجاج ما عندوش مع السهير، ومع الفيسبوك، داكشي علاش فين ما نعست بكري، كان الوالد يمول ليا، أمالك كتركد مع الدجاج؟ وخا الدجاج كان يعمر المراح بصق، كان عزيز علينا، كل واحد فينا تايقول هاذي دجاجتي، هذا فروجي، هاذي عتوكتي... وفي الأخير كلشي ديال الوالدة... وأحسن دجاجة عقلت عليها، كتشبه للدجاجة المرسومة في المكانة ديال السرسار، لي شراها الوالد باش تفيقنا للسحور. كنت نبقى حاضيتها مدة وهي تنقب ولا بغات تعيي. ماترتاح مسكينة تا ينسوا المكانة مايعمر وهاش. قبل ما تكون المكانة، كان كلشي معلمينو بالظل، فاش يوصل الظل عند باب البيت، كتقول مي راه 12 هاذي، وفاش يوصل الظل ديال الحيط عند الحجرة ديال المطمورة، كينوض الوالد يصلي العصر، وفاش يظلام الحال وينعس الدجاج يصلي المغرب، لكن الوقت كان طوييل، التحرير كان فيها ثلث اشهر، والليل طويل، مايصبح الحال حتى يطيبو جنبنا بالحصيرة، شحال من مرة كنقلب مرادوي كنلقى أثر السمار ديال الحصيرة، حيتاش الفراش ضعيف. ويلا اصبح الحال، اش جا ما يوصلك للمغرب

## نوسطالجيا بلدية:12

كان الوالد الله يرحمو تايرشم خروف بكري وتايكول لينا هذا هو لي غانعيدو عليه، وسبحان الله كايولي عندنا ذاك الخروف عزيز، وكلنا كنتهلاو فيه، وهكذا كانوا كاع الجيران تايعيدو على واحد من الزربية، والعيالات الهجالات لي عندهم اليتامى كانوا كيزبحو خروفة ، وحتى جارنا عيسلام كان كييعيد على خروفة. ولد علي مول الحانوت كانت عندو يومية ديال بوعياد، وعندو راديو ازرق، كانوا الناس كيسولوه على تاريخ العيد، وخا في العيد الصغير كان خاسر ليه الراديو ماجاب اخبار، وبقينا تالفين ، والكبار صايمين حتى جا واحد السيد من المدينة عاد فطروا اصحاب الدوار. نهار عرفة كان ديالنا حنا الصغار، كنتجمعو ويكفوني انا نجمع الدقيق والحبوب من الخيام حيتاش عندي قب ديال الجلابة الخضرا، وهوما تابيعني ، وهوما كيتبعوني ويكولو: أعرفة عرفتين كب الما نوبتين...العيالات كيتجاوبو معنا، كنعطيوهم شوية الحبوب ولا الدقيق، وكايعطيونا ريال ولا زوج ولا ربعة، وكاين لي تكب لينا اتاي، المهم كندورو على جميع الخيام ديال الدوار، وفي الأخير كنعسمو لي بقى من عرفة(يعني الزرع) وكل واحد كيمشي فحالو. عرفة تايوكلوها للحولي قبل مايزبحوه، كاتكون آخر لكمة ليه في الدنيا، وما كيستافدش منها حيتاش فاش كيزبحوه كتهبط من قرجوطو... عباس جارنا هو لي كان يعرف يسليخ، الوالد كان فقيه، غير كيكبر ويذبح ويتساخر اللور، يجلس فوق كرسي، ويعطي التوجيهات. كيدورو من خيمة لخيمة، حتى يذبحو لكشي، وفيين ما دازو كيهضرو على السمونية، البنات كانوا يتسابقو على شكون غا تدير الشحمة على راسها. وشي طقوس كانت ماعمرهم قدرو يفسروها ليا، ذيك الجبانية لي كيديرو فيها دمليج ويعمروها بالدم عند الذبيحة. الله يسمح ليهم كانوا كيقولو لينا، هذا ما وجدنا عليه آباءنا... الماكلة في ايامات العيد كانت كثيرة ومبرمجة، النهار الاول كلشي يشوي بولفاف والكبدة، وفي الليل يفورو على الكتف الايمن، الغد ليه يفطرو بالحريرة باللحم ولحم الراس ومع الغذاء كيديرو القطبان وفي الليل الرفيسة، النهار الثالث الشوا مع الغذاء وبالليل الحمائيس يعني الطواجن. المشكلة هي الماكلة لي كتبقى وكيشبعو بها الكلاب والمشاش والحشرات... حيتاش الناس كيتجمعو مع بعض، وكتكون الماكلة كثيرة، خصوصا كانوا يخافوا اللحم يخسر حيتاش ماكانوش الثلجات... وكانت الهضرة في السليخ على جلد البطانة كثيرة، حيتاش البطانة كان عندها أدوار كثيرة



هِيَ مَثْرُوسَةٌ مَنُحُوسَةٌ

جَمْرُهَا يُكْوِي ذَاتِي

يُسَهِّرُنِي الْعِظَامُ

وَيُزِيدُ غَلَاتِي...



## نوسطالجيا بلدية:13

بطانة الحولي كانت عندها قيمة، العيالات كيخافو عليها وكيطلبو من السلاح يتكاييس على الجلد، جلد البطانة كانوا تيصوبوا منو شكوة تايمخضو فيها اللبن، والصوفة تايصابو منها الجاللب والعباين ... وكاين لي تا يصايبو من البطانة هيضورة . وقبل هادشي كيستعملوها الشبان الكبار في عادة السبع بولبطاين لي تايلبس البطاين في رجليه ويديه وجسمو وتا يدور على الخيام بالليل وتابعينو الكبار والصغار، وتايخرجو عندو العيالات يعطيوه الفلوس واللحم حيتاش كانوا يعتقدوا أن ضربة خفيفة منو كتجيب الشفا... الحاصول الشبعة كاتكول للراس غني... الصباح فاش كايفطرو بلحم الراس والحريرة كيخرجو لبرا هازين سطولا ديال الما في عادة اسميتها حليلو، وكتبدا حرب المياه ... النهار الثاني هو كذلك نهار التطياح، يعني تا يكرضو الحولي، يفرزو كل حاجة وحدها، الكرضة، لحم المرقعة، الكديد والكرداس... وتاينشرو الكديد والكرداس في الحبل، وهنا كايبدا التفاخر بعدد الكرداس حيتاش هو مقياس السمونية. شحال من مرة دارها بيا اللحم النهار الاول، كايضربني للراس وكندوز الايام الاخرى كلها بلاش، وكتعطيني مي الكامون والقهوة كحلة ، ماكيفوتني الحال حتى يبقى غا الكديد. ولي كان كيبيقى فيا من هادشي كلو هو الحولي، كنبقى ندوز على بلاصتو نتفكرو، وحتى النعجة لي ولداتو كنت نشوفها كتشم في البطانة المنشورة فوق السطارة. وكتجمع وتزيد. ايامات العيد كلشي كيتبدل، كاتجي عندنا مي غنو لي خاطبة اختي لولدها، وكتجيب التفكير ، وكنبقى جالس حداها باش نشوف حتى تجري عليا الوالدة. وايامات العيد تيرجعوا فيها القمارا ثاني ، تايقمرو تحت الجطيوية، في وسط الجنان، والطاهر مول الكارطة كان كيشد الرابعة وكيجري على الدراري، فين مايشوفني يقول ليا والله ومامشيتي تا نقولها للفقيه. وكنزيد فحالي. الصباح كنمشي أنا وخويا بكري لبلاصة القمارا كنهبشو باصباغنا فين كانوا لابعين، مرة نلقاو عشرة مرة ربعة ومرات مانلقاو والو، فاش كنلقاو شي حاجة كنمشيو للحنوت نشريوها فانيد ومسكة ونرجعو ناشطين. الله يعمرها دار العيد الكبير

## نوسطالجيا بلدية:14

الليلة الثانية د العيد، كايجي خالي ومرتو نجمة وبناتو، خالي كان مدور الحركة: عندو عود ديال التبوريدة بسناحو، كل عام كيخيم في مولاي عبد الله ، كنمشيو انا والوالد ندوزو معه شوية ، كانت البنية ديال الخزانة عندو على البحر...الكبيرة في بناتو سميتها طامو، كانت كتجي عندنا مرة في الشهر، كتبات مع خواتاتي، وكتجيب الفونو تخدمو لينا نتصنتو للدياسك ديال قشبال وزروال والعوني والبهلول وقرزوز ومحراش وفاطنة الزحافة... كانوا تيعجبوني الأسطوانات، كييداو ديما بتقديم: اسطوانات بوسيفون تقدم ليكم العوني والبهلول... مثلا. قبل ما تخدم الفونو كتخطو الوسط، كتجبد الاسطوانات، كتسمح ليا نقرا الجاوات ديالهم وخواتاتي كيشوفو التصاور، وهي كتر اقب الفونو ، كتسمح ليه بلاصة الديسك، وكتراقب الشوكة لي كتخطها على الاسطوانة باش تخدم، وكتقول لينا السكات... وكييدا الغنا وحننا جالسين نتصنتو، كنبقاو نتصنتو حتى يثقال الصوت، كنعرفو بلي الحجر تقاضي، كتطفيه ونمشيو ننعسو. من بعد فاش الوالد باع ثور شري لينا راديو اخضر، كيشد الرباط وطنجة، وشي إذاعات سبليونية، وكان الوالد كيقول ليا شد لينا الاذاعة ديال الشلوح، كان عزيز عليه الإيقاعات الأمازيغية. هادشي ديال الآلات والماكن مكانوش بزاف، كلشي كانوا يديروه بيديهم، الحرث بالزويجة، والتزوريك باليد، والتكربيل بالعتلة، والحصاد بالمنجل، ودكان الذرية بالعمد: كيتجمعوا الرجالا وكيجيبو اعمد صحاح، وكايبقاو يخبطو في العرام ديال الذرة حتى يبقاو غا العظوما، هاذوك العظوما ديال الكبال هوما لي كانت الوالدة تطيب بيهم الما لأتاي، وتسخن بيهم الحمارة باش نعومو. أما الدراس كان الوالد كيجمع تقريبا عشرة الحمير حاشاكم، وكيزيد عليهم بغل كيديرو زعواط. الدراسة كانت صعبة بزاف، كتبدا من الصباح حتى تطيب الدراسة ويطييو رجلينا بالدوران، وخا كنا كنتناوبو عليها. لي كان يعجبي في الدراس هو العشة لي كيبيها الوالد في الكاعة، كنوليو نباتو فيها أنا وخويا، دايرين بحال شي مخيم في الخلا




خَزَائِنَةُ لِأَعْرَاسِنِ  
وَأَخَزَائِنَةُ لِلنَّفَاسِنِ  
وَأَخَزَائِنَةُ لِلنَّحَاسِنِ  
وَأَخَزَائِنَةُ كُلُّهَا وَسَوَاسِنِ

## نوسطالجيا بلدية:15

كيفوت العيد بثلت ايام، ما كيبقى لحم، وحتى ايلا بقات شي بركة كتعود فيها الريحة... وكنتسناو فوقاش يكرم الكديد، باش نديروه في باداز، كايجي واعر وبنين. وأحسن منو الملوي بشحمة الكرداس مع أتاى منعنع بالنعناع ديال العيايشة. حنا الصغار غير كيفوت العيد بشي ايام كيوليو حوايج العيد بحال ايلا قدام، كونساو اللحم، وكنبداو نفكرو في عيشورا أو عاشوراء.. البنات ماكانش عندهم مشكل، كايجبو الطعارج لي بقاو من العام الفايث، وكيبداو يتجمعو من العشية للعشية حدا لالة ميمونة، وتايبقاو يلعبو ويضحكو حتى يظلام الحال ولا اكثر، وحنا الدراري كنتفرجو ومرة مرة نلعبو قاش قاش ولا نتسابقو على شكل التبوريدة . وكنتسناو نهار السوق باش يشري ليا الوالد شي كابوس ديال الفرشي، وخا كان يفتسني حيثاش الفرشي كايبيعوه لينا غامل، خاصك تحطيه في الشمس باش يسخن... هاذ الطقوس ديال عيشورا كيستغلوها حتى العيالات باش يتجمعو ويضحكو في أجواء جميلة جدا. مناسبة عيشورا، كانت مناسبة زوينة كتستمر ايام قبل ما يجي نهار الشعالة، لي كيديرو فيه الرفيسة بالدجاج البلدي، وكيفرقو علينا التمر والشريحة، ومع المغرب تا يديرو الشعالة: تايشعلو العافية وتايبداو يغنيو وحنا تانفزو فوق الشعالة، وكانت مي كتدير كديدة في قطيب وكتشويها في عافية الشعالة وتفرقها علينا ناكلوها، كانت بنينة بزاف... وتايكملو البنات السهرة تايغنيو: عيشوري عيشوري... عليك دليت شعوري، وخا شعرهم كان إما حازمينو بزيف وإما مشعكك، وكيعبرو على الحرية ديالهم في هاذ المناسبة وكايقولو: هذا عيشور ماعلينا الحكام ألالة... الخ... وفيهاذ المناسبة تايזורو الناس المقبرة، كيترحمو على الموتى، كايديو الخبز والتمر والشريحة والماء، تايفرقوهم على الناس، وكيعطيو منهم للفقهاء لي تايقراو القرآن ترحما على الموتى. وكان الوالد من بين الطلبة، كيمشي، وتايجب لينا في العشية الخبز والشريحة والتمر، مانسيتش الشريحة ديال ذاك الوقت، كنت فين ما ضرني الجوع كتعطيني مي خبيز وزوج شريحات كندوز بيهم. الحاصل كنبقى معوشر مدة

## نوسطالجيا بلدية: 16

الصراحة وها كانت العطل طويلة، أنا في صغري ماكان عندي عطلة، غير نقول للوالد تحررنا يشد ليا من يدي ويديني للجامع عند سي عبقادر الله يرحمو، كايكول ليا راه القران كيحل الدماغ ويفتح المخ، كان يحساب ليا الدماغ بوحدو والمخ بوحدو... الجامع بوحدو قصة طويلة، لكن غانعاود ليكم داكشي لي بقيت عاقل عليه. أول حاجة الصلصال باش كنا نمحيو اللوحة، حتى هو كنت كناكل منو. عقنتو على الطباشير والفاخر؟ مع الدخلة سي عبقادر كيدير معايا مراجعة لداكشي لي حافظ، وتايعطيني لوحة قديمة نمحيها بالصلصال، وكنحطها تكرم، ونجي نجلس، غايشوفني بركت كايقول لعبد السميع سير تحفظ ويعيط عليا نضرب عليه البرشمان بينما كرمت اللوحة. كنتسالي السداية بعد شي ساعتين ولا اكثر، كايكول ليا جيب اللوحة وبرك كدامي، كيهز في يدو القلم ديال القصب وكيغطسو في الدواية وكيكتب ليا ماتيسر، وتايقراها ليا مرة ونقراها عليه مرة وننوض نحفظ. الجامع عامر باولاد المدرسة، كل واحد يقرا في جهة، والفقيه يخيظ في الجلابة ومرة مرة يهز القصب الطويلة ينزل بها على شي واحد غافل. الفقيه ديما جالس على 2 هيضورات، وحا على الحصيرة، كتبقي مصورة لينا في رجلينا فاش نخرجو. شحال من مرة شي واحد كيقول للطالب نعمس بغيت نخرج، وكيخرج ويهرب بحالو، كنا كنفرحو يجي شي حد عند الفقيه، غير يدخل كنسكتو من القراية، وكنبقاو متبعين الفيلم ديال الضيف مع الفقيه. كنا دايرين النوبة، كل مرة 3 او 4 يجيبو الفطور للطالب، كيفطر هو والناس لي جاو عندو، فاش نقربو نتسيبو كيكب لينا شوي في الكاس ويفرق علينا الخبز لي شاط عليه. شحال كان بنين هذاك الخبز واتاي ديال الشياطة، في آخر الحصاة كييعيط على شي وحدين يعرضو، لي عرض مزيان يمحي لوحته ولي ماعرضش يرجع لبلاصتو. مانسيتش نهار ماتت الحمارة ديال الطالب، طلع ليه الدم، وبقي كايكول : مابانت ليهم غا حمارة الطالب كلشي حاكر عليها، كاع الدراس ديال القبيلة دوزاتو، هانتوما قتلتها وحمدوا الله... كانت لحظة الخروج زوينة، الفقيه ما تيخرجناش دفعة وحدة، كايبقي يصيفط بالواحد بالواحد، باش مانبقاوش نتضاربو، وكنا نبقاو نتسناو ولي سمع سميتو كيفرح ويشدها بجرية لخيتمهم. الفقيه كان ديما يفكرنا في الاربعية والحدية، كنجيبو ليه ربعة ريال الاربعاء وربعة ريال الاحد، ومن العام العام كاياخذ الشرط من القبيلة، عبرة ديال الزرع للواحد. والنهار الزوين هو فاش كيخرج شي واحد اللوحة، كيزفوه اصحابو من الجامع حتى لدارهم وهو هاز لوحته مزوقة مزيان من عند الطالب، وحا تابعينو تا نكولو: طالب طالب يايوه... أسعدت مو وبوه.... الخ. والأهل ديال المحضار كيديرو مأكلة زينة للطالب ولينا كاملين.



كُئِلْ مَا يُخْنَزُ لَحْمَاكَ

وَيُفَوِّتُو الْقِيَّاسَ

دِيرُو كَدِيدُ

وَدِيرُو كُرْدَاسَ

وَحَلِّي الشُّمَيْشَةَ

تُضْرَبُو لِّلرَّاسِ


## نوسطالجيا بلدية:17

العيالات في العروبية كانوا تخدمو اكثر من الرجالا، تلقى الوحدة تفيق بكري، تحلب البقرات، وتخرج البهايم، وتشطب المراح، وتنشر الخضار تلصقو على الحايط البراني، باش يكرم ويعود وكيد، يطيبو به، وتطيب الفطور، والرجل مازال مافاق، ويلا كان وقت الكرموس كتكلع سطل، وتفيق الدراري، تظهرهم وتنقي ليهم الكرموس، وفين ما كانت شي كرموسة طايبة تعزلها للرجل. يفيق الرجل، تبردع ليه الحماره حاشاكم، وتصيفطو يسرح البقرات في بلاصة اخرى. وتبقى هي في الدار، تخمر وتطيب الغذاء، وتغذي الدراري، وتهز الغذاء ديال الرجل وتمشي عندو. وتماك كتبقى تهيشر وتجمع الحطب، ومع العشية كتتهز الحزمة على راسها، وتركب الرجل على الحماره، وتسوك البهايم حتى للدار، فاش يوصلو، هي لي تربط البهايم... وماتنعس تاينعسو كاملين. وزيد وزيد ايلا عندها شغالات الغزيرل والمنجج... كانوا العيالات صبارات اكثر من القياس، ويلا شفنتهم مع بعضياتهم تلقاهم ناشطات حتى للسقف، ايلا كانوا مجموعين فشي دار كيسبقو الرجاله هوما اللولين، تايساليو عاد ياكلو العيالات. ويلا جات شي وحدة غضبانه واكله العصا تلقى العيالات كبيرروا داكشي ويكولوا ليها راه غا راجلك، يضربك ومايخلي لي يضربك... وهادي هي الجملة لي كانت كتفقسني، بحال الجملة الاخرى ديال: اسي الفقيه انت اذبح وانا نسلخ، كان الضرب عادي جدا بل ضروري في التريبة... لكن هادشي ماكينيش ان الرجالا ماتخدموش، ولكن كانوا تايديرو داكشي لي ماتكدش عليه المرا، بحال الحرث، التنكال ديال الزرع على ظهر الجمال، دكان الذرية، تدخل الزرع للمطمورة، الحصاد وسير وسير... وفاش كان تيعجبني خي عامر كان ديما محرف بشكارة فيها محرارة ديال الكرن وموس بوضلعة، من بعد بدلو وشرا موس ديال سبعة النقشات. المحرارة فين مامشى ياكل بها سيكوك ولا الحريرة ولا الحسوة، أما الموس فكان يستعملو في الوضيقة ديال الدوم، كان كيساوب الكفاف والعلافات والشواريات وحتى البرادع... وكان كينقي به الكرموس ويحسك به القناب ديال البهايم

## نوسطالجيا بلدية: 18

الله یرحمو " البرادعي " مسکین، ایلا ما سمحوش لیه حمیر الدوار حاشاکم، ما عندو فین یرکد: کان کیصاوب البرادع، کایجی لدوارنا مرة کل ثلث أشهر، لی عندو شی بردعة عواجت ولا ثقت ولا مابقاتش مکادة فوک ظهر البهیمة، کيجیبها لیه یعمرها بالتبن، کان رجل صحیح بحال الشیفورات دیال 1020 ، المشکل کان کبیکى یعمر فی البردعة تبین حتى کتولی اثل من الحمار نفسو، وفی بلاصة ما یهز الحمار رجل فیہ 80 کلغ، تایعود هاز 160 ... وحتى الناس تاتضرهم فی کتافهم فاش بیغیو یردعو، وحتى الذنابة کیغلظها. عیاو ما یکولو لیه نقص شویة ، ولی فراسو فراسو. کان مسکین غریب الأطوار، ما کیشرب أتای حتى یکب فیہ عاشق دیال البزار، وفاش سولتو، علاش الکاس حلو وانت تحریه؟ کال لیا راه البزار تایسخرن وتایقتل المکروب. الحقیقة مع کان بیات براء، ایلا ما سخرن بالبزار محال ینعس بالبرد، وذاک الساعة کان فصل الشتا بارد، خصوصا اللیالی، حتى من الکلاب کتبات تنین بالبرد... وکنا کنبقاو حنا الصغار مقابلینو وهو خدام بنهار، کان الله یرحمو کیعاود لینا شی کلام فاش نکولو للوالد کیضحک، ویقول لیا هذاک کیعطي صلیة للکذوب، مثلا کان یقول لینا: شفتو أنا راه با کان قاید، وکانت عندو علفة دیال الخیل وفوق سبعمیة هکتار، وفاش مات جا عندی المخزن قالوا لیا أش بغیتی تكون وزیر ولا باشا ولا قاید، قلت لیهم لا، بغیت نبقی غا برادعي.... هههه، والله فی خلقه شؤون. کیمشی هو، کیرجع الصمت للقبیلة، خصوصا مع البرد، کلشی داخل یتسنی شركة وبرکة من الشمیشة... الرجالة لی کانوا عار فینو، کانوا کبیکوا یتعجبو فی حالتو، وکیسولو بعضیاتهم فین کیخرن الفلوس لی کیصور، ما عندو فاش یصرفها، لا اولاد، لا کارو، لا کسوة، حتى الماکلة کيجیبوها لیه الناس، وشحال غایخر کاع علی البزار؟





## نوسطالجيا بلدية:19

هاذ التقسيم لي كان دابا في الديور، بيت النعاس، الصالون، الكوزينة... ماكانش عندنا، حنا في الخيمة كان عندنا البيت الكبير والبيت الصغير، والبيتة وهي بيت صغير تيخزنو فيه لي شاطت، والدهليز ديال الدجاج، والكشينة، والكوري وبيت التبن، وعلى برا كاين المطمورة والسطارة وزوج شجرات كنربطو تحتهم الكلاب، المراح كان كبير والحيط مبني بالحجر والتراب، ماكاين لا جير لا صباغة، مرة مرة كتزوقو الوالدة بالخضار على شكل أقراص ... كينوض كلكاز فوق البيوت، وخا هكاك كان كيغجني المنظر فاش يكون فصل الربيع، وكتولي الخيمة بحال شي لوحة طبيعية. البقرة مربوطة وسط المراح كُتْجُرُ في الماكلة، مبرزطها الذبان في عينيها، وخريف صغير كينقز حداها، والكلب ناعس على جنب البيت، ومشة واكفة فوق السطارة حاضية ليخرج شي فار ولا بوبريس ولا حنش... الوالد مقرد حدا الباب، فين مابغى شي حاجة يسخرني، كنت عارف كل حاجة فين جات، المحراث والكرابة والكفية وسوارت المحراث في الحمّام المهجور، القبيشة أو المشطة حدا الدهليز، البردعة والشواري في جنب البيتة، الدلو والركوات حدا الخابية، والخابية كانت مدفونة نصها في التراب والنص الآخر دايرة بيه خنشة ديال شمرتل مبللة باش يبقى الما بارد، كامات البهايم معلقين في العمود ديال الكوري، وفاش كيغني يخيظ الجلاب كنجيب ليه الجلابة ملوية في زيف، وصنيديقة ديال الدوزان، فيها الخيط والابرة والمقص والمخطاف والحلقة والشمع ديال النحل، وجعبة ديال الحرير باش كيسدي السداية، وكتجي اختي الكبيرة تخلف عليه وأنا نجلس حداه نركب ليه الابرة، حيتاش النظاظر ديال الشوف مابقاوش يشوفو ليه مزيان، كسنين مابدلهم. فاش كتكون الفلاحة كيخلي الخياطة وينوض. كانت الفلاحة عندو شي حاجة مقدسة، ماكييدا يحرث ولا يدرس ولا يغرس حتى كيسمي الله ويصلي على النبي ، وفاش كيصفي الدرسة وكبيدا يعبر في الزرع، كيכול ليا وقف حدايا واحسب معايا، كيدير تسعود في الخناشي والعاشرة في خنشة اخرى، وكان كيخاف على زرع العشار أي الزكاة، لاتعود تاكلو شي بهيمة. فاش نجمعو المحصول، كنا نديوه للمطامر عند الهراولة، حيتاش كان عندهم تربة ديال التيرس، الزرع فيها ما تيخرکش

فَشَاكِلِي

هَذَاكَ زَمَاالانْ  
ما كانش دُغْناشْ  
كُنَّا نَفَرَحُو  
غا بَضُو فَنَاشْ

## نوسطالجيا بلدية:20

ما بقات فرارة ما يلحسو الكلاب... هادشي لي ولينا نسمعو مورا الجفاف، حيتاش ماتوا البهايم وما بقاش الحليب واللبن كيف كان من قبل، وتزادت الشركات ديال جمع وتسويق الحليب، حتى ولاو الناس في العروبية يبيعو الحليب باش يشريو السكر واتاي والسلعة الاخرى... من قبل، كنا نشربو الحليب سخون، من ضرع البقرة للكاس لكروشنا، وكانت الروابة ديما عامرة، وكل نهار الشكوة خدامة، كان يعجبني نمخض الشكوة، وفاش تطيب على الجيران كتكبها الوالدة في سطل، كتجمع الزبدة بيدها، وكتدير اللبن في بيدوزات تفرقو والنساب، فاش كبرت شوية، جاب ليها الوالد شكوة ديال القصدير بغلاقتها، مصاوبينها من طوارو ديال الزيت خاوين. ايبويه مشات الشكوة وبقات الشكوى، والشكوى لله... المهم، حيانا الله حتى ولات المرا تبيع لترو ديال الحليب لمول الحليب، وتخلي اولادها بلاش. أما الدجاج البلدي وبيبي، فكانو العيالات كيهتمو به بزاف، حيتاش بيه باش كيتكساو، كتجمع المرا البيض وتديه للسوق، ومرة مرة تصبح مي توكل فشي فرارج، كنعرفها غاتبيعهم، كنسولها علاش توكلهم ياك غاتبعيه، كنعقول ليا: باش يتقالو ويجيبو الثمن. وكانت فاش تبيع شي فرارج كتتهلى فينا، باقي نعقل كانت ديما كتشري ليا هي والوالد سروال دجين لاصقة فيه اللور بلاكة ديال الشركة، وصندلة ميكا ديال فرنسا، كنت انا لي كنبسها في الدوار، حتى لواحد النهار شفت الشيفور ديال القايد لابس بحالها، عاد تفرقت عليها. من الحويجات لي كنت نلبس ولي عمري ماننساوهم واحد الكابيشون جابتو ليا عمتي من عند نصرانية كانت بنت عمتي خدامة عندها ، الكابيشون كان اكحل، وفيه صدافي غلاظ ، وعندو قب، سخون ودافي، وحتى اللبسة فيه ناضية، مابغاش ينقطع، بقيت لابسو حتى صغار عليا واعطيتو لخويا

## نوسطالجيا بلدية:21

لي كال العرس ساهل يسكي ليه ماه... هاذ المقولة كتبين بلي السكي ديال الما من البير  
ماكانش ساهل... كان الوالد بيردع الحماره حاشاكم، يلاكي الركوات زوج مع بعضياتهم  
بقنبة ، ويديرهم على ظهرها كل وحدة في جهة، ويلوح الدلو فوق وحدة فيهم. ويركب وانا  
نطلع كدامو، ونشدو طريق البير. فاش نوصلو، يوكف الحماره قريية، يفك الحبل ديال الدلو،  
ويدليه في البير حتى يعمر، ويلوح ليا الحبل من فوق الطورني أو اللولب، كنشد الحبل  
مزيان، وكيجي شي حد يعاونني ونمشيو كنجرو الدلو على طول المجبد، المجبد كانت فيه  
شي عشرين كامة، كل كامة فيها شي مترو ونص، ونبقاو نجرو حتى نسمعوا با قال: عايد.  
عاد كنرجعو، كيشد الدلو يخويه في الركوات ويعاود يدليه ثاني، وما كييعمر وذك الركوات  
حتى يغفر لنا الله. ويلا كانوا زوج عدالات آرا ما تجبد. المشكلة ايلا كانت شي ركوة  
كتسيح، كيوصل فيها غا النص، تخويها في الخابية ما تعمر هاش. وفاش تسكي، توصل 12  
خاصك تدي البهايم يوردو، الدوار كلو كان كيورد البهايم في الجابية ديال البير، وتماك  
خاصك تشد النوبة، ماحيلتك تحبس بهايماك ماحيلتك تجبد الماء، غير اولاد القبيلة كيتعاونو  
وصافي. ماكاين لا شركة الما والضو ولا شركة الزبل، البرويطة كاتجمع كاع الروث ديال  
البهايم ونخرجوه للبدوزة، كيتجمع حتى يقرب موسم الحرث وكنشنتوه في البلادات مزار،  
أما الرماد، كنا كنعطوه بوحدو في المرمدة، وفي الغالب كنعشنتو الرماد في جناب الضرك،  
وشحال كان زوين كرموس الضرك لي تحتو الرماد. واحد الكلب عندنا كان عزيز عليه  
يتمرغ في المرمدة، كان ديما بحال ايلا داير ليميش... الحمير حتى هو ما كانوا يتمرغوا،  
طالاسوتيرابي طبيعية، الفروج كانت فيه عادة أخرى، كان كيخشي راسو في الماء، وكينفضو  
وكيقي ريشو واقف، كان كيدير التشويكة قبل اولاد اليوم... حالات غريبة، وأغرب منها  
الكلاب فاش كيسمعو القرطاس كيوليو يترعدو، وكذلك فاش يسمعو الرعد، ويلا بدا الحمار  
ينهق كيقلشو وذنهم ويبدأو يعوكو بحال الذيب... من غير داكشي كنعلقاهم سبوعا لي داز  
يتبعوه بالنبيح، ويلا بان ليهم شي كلب براني كيهجمو عليه ماينفعوه غا كعابو، الحاصل  
الكلاب غا كلاب

# تَاغْنَجَة

إِيهْ يَا تَاغْنَجَة... يَا مَكْطُوعَةَ الرَّجَا

مَا جَاتْ بِكَ شَتَا... مَا كَانَ بِكَ نُجَا


## نوسطالجيا بلدية:22

النهار الخايب، فاش يتطلق ليا الحبل من يدي ويطيح ليا الدلو في البير، الوالد كتطلع ليه  
عاشة للراس، ويبقى عليا بالدعوات الصالحة، كيتسلف دلو باش يكمل العدل، ويسوك  
الحمارة للخيمة، غادي ويدير فيا شي شوفات وانا حاضي معه، تا يخلي البير حتى يخوا في  
العشية، كيحتي على قنبة من الدلو ديال جارنا عباس، ويكملها بطوال البغل، ويهز الكوكاط  
ويكول ليا زيد كدامي نكوكطو على الدلو، كنوصلو للبير، كيدبر على حجرة يديرها ثقالة  
للكوكاط، كيغطسو في البير ويسير يكوكت، مرة زوج ثلاثة عشرة، مايتفاكش حتى يشد  
الكوكاط في القنبة ديال الدلو، عاد يلوح ليا الحبل ويكول ليا سير مع المجبد، كيجبدو عاد  
يتبشر، كنجموه، وكنرجعو فرحانين، عاد كيدا يسول فيا أش قريتو البارح؟

## نوسطالجيا بلدية:23

فاش كان كيسولني الوالد على اش قرينو البارح ، كانت كتكفيني معه نكول ليه قرينا التلاوة والإملاء والأشياء والدين، وعند مول الفرنساوية قرينا الليفر وديكتي وكونجيكيزون... غير كنكثر عليه المواد ما كيغادوش يسولني، وكيبدا يتبسم، ذيك الساعة كنستغل الفرصة وكنكول ليه خاصني منشفة، حيثاش المعلم فاش جاب القرعة ديال المداد من الإدارة ، وبغى يعمر لينا المحبرة ،تدفكت ليه فوق الطاولة ديالي ومسحت المداد بالمنشفة... وفاش كيكول ليا وحا، كنكول ليه جيب معك حتى ريشة ديال الفرنساوية، هذيك لي جبتي عواج ليها القمقوم...  
عمرني متنسات ليا ريحة المنشفة ، كانت زوينة هي وريحة القسم في الصباح فاش كنا نجيو بكري باش نحولو الطاولات لبا عبد الله الحارس باش يشطب القسم. المدرسة كانت عندها ساحة كبيرة فيها حديقة، والمعلمين كانوا عندهم الطوموبيلات جداد، إيركات، إبرويت، سيمكا، فياط، إيرسيز.... وحنا التلاميذ وحا كنا مختلفين في الأعمار، شي وحدين في الشهادة كانوا بمساطجهم، ولايني كان اللباس تقريبا شبه موحد، ماكاين غا سروال وتريكو ملحوسين وحلومة... البعاد كيجيو على حمار حاشاكم، ولا كيجيوهم والديهم. كان عزيز علينا ناكلو في المطعم، شي فروماج ديال برا كان مذاقو بنين، وريحة الحليب ديال الفطور كنشموها من بعيد، وريحة الحوت ديال الحك كتجمع شلا قوانع حدا المدرسة... كانت الطريق بعيدة من خيمتنا للمدرسة وكاين لي أكثر مني، كنا كنبقاو بين الصباح والعشية غير في الساحة تحت الشجر، كل واحد حاتي على شدك ديال الخبز، وقرعة خضرا داير فيها أتا، وغالقاها مو ببوشونة ديال قرعة الزيت. داكشي باش كنا ندوزو النهار، وكنبقاو نلعبو حتى يرجعو المعلمين مع العشية من المدينة. كدام المدرسة كانت الطريق الرئيسية بين الجديدة ومراكش، كان الحديد قليل في السبعينات، كنا كنبقاو لعبة الروايد، كل واحد يشد اتجاه، إما الجديدة ولا مراكش، ايلجا كاميو من جهتي عندي 6 الروايد، تبعاتو طوموبيل من جهة لآخر عندو 4 كنبقى رابح ب2 وهكذا نبقاو نحسبو ولي وصل 10 النقط كيسلخ لآخر بعشرة الضربات خفافات، كانت لعبة مشوقة وحا فيها العصا... وحا كنكملو النهار بصعوبة ولكن الشكارة كانت خفيفة، كترجعو بالجري، كنعقل على واحد الشكارة جابها ليا الوالد ديال الجلد دوزت عندي ربع سنين، والدراري كاين لي تنتشرك ليه ويجيب الأدوات في ميكة... وكانت القرارية: كل صباح مول الفرنساوية يصبح علينا بجدول الضرب والضرب، ونهار الخميس معروف ديال الكوجيكيزون، ماكاين غا العصابة، المهم المعلمين ديالولي الله يجازيهم عنا خير الجزاء، وكنطلب منهم المسامحة، انا مسامحهم دنيا وأخرة





آآرآ مَا تُكُوفُ وَآرآ مَا تُلُوبُ  
الْقُنْبَةَ رَاشِيَةً وَالْدَّلُو مُتْقُوبُ  
الزَّمَانُ قَاسِيٌ وَالْوَعْدُ مُغْلُوبُ

## نوساطالجيا بلدية:24

الحاجة لي كانت تنغصني، هي فاش كنرجع من المدرسة، نلقاهم كينكلوا في الذرية بعدما خرفوها بالمنجل، كانوا يجيبوها على ظهر الناقة في الجراف، الذرية كلشي فيها كان صعيب، من التزوريك، تظل النهار كامل وانت تابع الزويجة تزورك، ومن بعد يربطو ليك القبيشة تمشطها، وفاش تطلع شوية يكربلوها بالعنلة، ومن بعد يكربوها بالكرابة، ويقشبلو منها للبهائم باش ماتبقاش حرشة، وفاش تكبر ويثمر العربود، كتعجيني فيه الشواية في الخلا وحننا سارحين البهائم، كنوكدو ونجمعو هويشرات، ونشعلو العافية، ونسوطو عليها بكلمونة ديال الكبالة عاد نشويو الكبال حتى نعركوها... فاش يجيبو الذرية كيستقوها في المنشر، وكان المنشر كبير كيخلع، حيثاش كان اصعب حاجة عندي انا وخوتي هو التمراش، يعني تملاخ الذرة. فاش كييدا التمراش كنبنيو دراكة على الشمس، وكنشدو الخرجة من الراس، نمرشو الكبالة ونحطوها حدانا ونلوحو القشبييل ورائنا، الحاجة الوحيدة لي كانت تلاهينا هي كنا كنلعبو لعبة الحمير، فاش نلقى شي كبالة مزوقة بالذرية صفرا وكحلة كندير على خويا حمار، ويلا لقيت كبالة حمرا كندير عليه عشرة، وكنبقاو نحسبو حتى نساليو، وفاش تجي تنوض تلقى راسك مكوانسي من طول البركة. وفاش نساليو التمراش كمنشرو الكبال يكرم في نفس المنشر، وفاش يكرم ندكوه بالعمد... المصيبة أن الذرية فيها هاذ تمارة كاملة وفاش تبغي تعجنها خاصها تتخلط مع الفورص باش تجي رطبة، أما ايلا درتيها فطيرة كتجي حرشة. الله يعمرها دار القمح والفرينة والشعير، ازرعهم ونساهم حتى للحصاد... ومن بعد الدراس، وكتبقى الحصيدا يروطيوها العيالات بالراطو، ويجمعو الهيشر باش يطيبو في الليلي، يزيده على الوكيد والعظوما ديال الذرة والشليخ ديال كرم الضرك... كانت مي تحمد الله وتكول ليينا، ماشفتو والو اوليدي، راه كرمنا الله بالمكينة ديال الطحين، بكري راه كانوا واحلين مع الرحي، النهار وما طال وهو ما يطحنو، وفعلا كانت كتوريني الرحي لي كانوا يطحنوا بها ولي ولات مي تطحن فيها الحنة صافي...حاجة مانسيتهاش كانت كتصدق وسط الذرية وهي الكرعة، كانوا تيزرعوها كتنوض وتسرح وسط الذرة، وفاش تكبر كنوليو نفورو بها باداز

## نوسطالجيا بلدية: 25

الخدمة المداومة في العروبية هي المقابلة ديال البهايم، وُكْلُهُمْ ، وُرْدُهُمْ، انْكَسْ لِيهِمْ، طَوْلُهُمْ، اسرحهم، احلب البقرات... أما الفلاحة كانت غير وجبات، وقت الحرث ، يكلبو الارض ويثنيوها ويزرعوها ويمشطو... وقت الربيع ينقصو منها النباتات الزائدة بالحشان، ما كاين لا دوا لا مبيدات، حتى لهننا هنا عاد كنت كنسمع الوالد كيقول ليا غا نجيب واحد الخنشة ديال الفاز فاط، كيقتد بها الأسمدة المنتجة من الفوسفاط... ووقت الحصاد... واوقات اخرين. الملل، حنا الصغار كنقضيو عليه باللعب كتكون فيهم الخدمة... أما بقية الوقت كان الفراغ كاع ما حاسين، والكبار كانوا يتسناو العشية باش يجمعو حدا الحايط ديال الجامع مع الرداد، كييقي يحاجي عليهم، وحاضي لي داز يدبر ليه على نكتة... العيالات مساكن كانوا مقابلات الخلا والخيمة، يخدمو برا ولداخل، والوقت الخاوي كتشغل فيه بالصوفة ولا كيتجمعوا في كل عشية كدام باب الخيمة، كيضحكوا ويسولو على فلانة واش ولدت ولا باقا باش يمشيو يزرروها، ومن بعد تدير ليههم كصعة السمية، فلانة واش رجعت لخيمتها كانت غضبانة، فلانة عامين وهي مزوجة باقا ما حملت خاصها تدير الكديدة باش يجيب ليهما الله لي يثبت ركايزها مع الرجل، فلانة بنتها مخطوبة هادي شهرين امتي غاتدير العرس، فلانة رجليها كان في الصبيطار شهر وهو ناعس خاصهم يمشيو يشوفوه... الوالد فين ماتكوليه مي غادين نشوفو شي وحدة عندها وعندها، كيدور فيها ويكول ليهما انتوما العيالات النهار كامل وانتوما تيلانيو غا فين تكوكطو، حيتاش هو لي كان كييعطيها فلوس الغرامة في العراسات وفلوس السكر باش تدي العارات كيما كانت تكول... المهم كاتمشي كاتمشي. حتى انا كنت كنفرح فاش تمشي مي لشي مناسبة وخا ماكانتش تديني فاش بديت نكبر، ولايني كانت ديما تجيب لينا لحيمة في خبيز، وخا قليلة كتجينا فيها البنة واعرة، وشي مرات فاش يكون الكسكسو كيسكيو لينا. الوالد مع كان فقيه، كان وجهو كيتبشر، ويولي حنين وظريف فاش تجيه الاخبار من عند سي عبقادر بلي كاينة زردة في اولاد ساعد ولادوار الخضر ولا الشويرف... كيتوضا، كيبردع الحمارة، وكيلبس الجلابة البيضة وفوقها الجلابة الرمادية، ويلبس بلغتو الصفراء، ويجر الحمارة من راسها حتى لعند المحكن ديال الدجاج، كيطلع فوك المحكن وكينفز فوك البردعة، وما كانشوفوه حتى للصباح، ماتايبيغيش يفطر، وكيتغذا معطل حيتاش الطلبة كانوا كيديرو البلان، وكنا كنضحكو معه بها



## نوسطالجيا بلدية: 26

الصيف في عروبيتنا كان حالة خاصة، مع الحرارة كيكثر فيه الذبان وشنيولة من لكواره ومن البدادز، والبوصيح في التبن، وكيعانيو من الحشرات حتى البهايم، كايكونو مربوطين في الحصيدة المجدرة، يعني لي محصودة من الجذر، ماشي لي مكصبة مخلينها للحطب ولا باش يسقفو شي نواله، مع جوايه الظهر، تيبانو لينا حاشاكم الحمير زعرطو وكطعو الطوالات، كنعرفوها النعرة كالت ليهم جنابهم، والبقرات تايككو وكطعو رباطاتهم، ودخلوا يجريو للكوري، كنعرفوها تيكوكه ليّطتهم. النعاج والكلاب كان كيقهرهم الذبان الغليظ، أما الكراد فكان كيشد في ضرع البقرات ولا في وذنين الكلاب. فاش كان الوالد كيمشي للسوق كان يجيب شي غبرة كيداويهم بها من عند مول دوا البرغوث. وكيجيب حتى دوا الكمل كتديرو مي في الثنيات ديال الحوايج من الداخل. الهيموش كان غادايغ، شحال من مرة في القسم كتبان ليا الكملة دايزة في الدفتر مع السطر، كيقهرها الصهد وتتلاح... داكشي علاش كانوا الدراري بزاف كيصلعو، باش مايبقاوش يحكو روسهم كل ساعة، الكمل كان عارف الوقت فين ياكل، حتى كنتخشاو في المانطة بالليل عاد يسرح. كيبات يفرس في عباد الله. ماهنا حالة... فاش خرجو شي أنواع ديال الصابون والمسحوق وربما شي حوايج طيبة مافهمناهاش عاد مابقاش الكمل. الحاصل ومافيه العروبية كانت كلها صراع مع الحيوانات والحشرات والطيور وخا داكشي ماكانش كيضايقنا بزاف، كنا كنتعايشو معه. بزاف الحوايج زوينة كتغطي على هادشي خصوصا كانوا الناس تيلقو من هاذ المعاناة نكت وفرجة بيناتهم، حنا الصغار شلا مايلاهينا، كانوا شي نهارات كيدوزو عندي مبرعين فاش ك نرمي الفخ للطيور، كندير دودة في الفخ، وكنصوبو ونغطيه بالتراب، ونحادي الفراخ جهتو، كنشد حمرة العنيك و عبدالله جنيح وحمرة القزبية وسطيلة وطوينة... كل نهار ورزقو، أما الجوج فكنا كنرميو ليه الشبكة في الضاية ديال البير فاش كيجي يشرب، كنشدو بالعشرة أو اكثر دقة وحدة. كنا كنريشوهم ونديروهم في قطيب ونشويوهم، مع مليحة كايجيو بنان. لي مذاقش الجوج ما ذاق والو...



مَشْرُوكَةٌ مَبْرُوكَةٌ

خُبَيْرَةٌ الْمُحْرَاثُ

مَا تُبْدَا الرُّوكَةَ

حَتَّى تُكُونَ زَوَاثُ

أَنْدَهُ اللَّهُ يَسَخَّرُ

رَا لِيَّامٍ مَشَاتُ

## نوسطالجيا بلدية:27

فاش كيبيغي الوالد يمشي للمدينة، كيدر دح الحمار حاشاكم، وكيدر عليه الشواري، كيزير الشناق، وتوقف الوالدة كتوصي فيه: جيب معك صابونة ديال الحجره وماتنساش الغاسول، وجيب صندلة لعاشة راها تكطعت ليها كتمشي عا حفيانة، والنعاغ، والسكر واتاي... ودي معاك الدرري يحسن راسو راه غوفل... عليا أنا زعما، كنبدل حوايجي بالزربة وكنلبس صندلة الميكا ديال فرنسا، وكنركب مع با، كنديرو شي ساعة في الطريق باش نوصلو للجديدة، مع الدخلة، كتحطو الحمار في الفندق ديال الحمير، وكيبقي با داوي مع صاحبو الخراز لي كان كيخدم في باب الفندق... عاد كنشدو الطريق لوسط المدينة، كيمشي الوالد عند مول الجلاب كيعطيه داكشي لي خيط، وكايتخلص وياخذ جلاب اخرين، وكنمشيو عند الحجام باش نحسن، الحجام كان حانوتو فيه خامية عندها الباب بالسلاسل كيتقربو، فاش نسالي كيعطيه الوالد ربة ريال وهو كيعطيني زوج فانيدات ديال المكانة، نسالي نبقى بارك حتى يكلع الحجام الضرسه لشي واحد، ويكلع الدم للوالد، عاد نمشيو نتقضاو. كنت كنسهي ونبقى نشوف في النصارى وشي ماركات غريبة عليا، لكن با كان حاضي معايا، فاش نكونو راجعين، كنركبو في الكوتشي حتى للفندق، وكخلص الوالد مول الفندق ب 6 ريال، وكنركبو كنتخلع من المدينة، ونرجعو للدوار. كنبقي نعاود لمي داكشي لي شفت كامل، وحا كنت كان كيبان ليا فرق كبير بيننا وبينهم، وكنكول وانا صغير، محال واش شي نهار غا نقرأ في المدينة

## نوسطالجيا بلدية:28

ثلاثة الحوايج لابد ندوي عليهم، تاغنجة، عبيدات الرمي ، وموات الحمير... كيما كلت من قبل ، العيالات ديال الدوار كان خاصهم غا السبة فين يتجمعو يضحكو ويلعبو بالطعارج ويغنيو، وفاش كانت الشتا كتتعطل، كيبقاو على طويمو حتى تدير ليهم تاغنجة، كيتجمعو كدام شي خيمة كتجيب طويمو مرت الجويليلي كصبة وكتلبسها تحتية ودفينة وتدير ليها يدين وراس بالشرائط، كتشدها وتزيد ورا البقرة لي تايسوكها شي دري صحيح بقنبة من كرونها، والعيالات كيتبعوها بالغنا كيرددو كلمات يطلبو بها الشتا منها: تاغنجة حلت راسها... ياربي فك خراسها

كايبقاو تابعين البقرة حتى تبول حاشاكم، وكيبداو يزغررتو فرحانات ببشرى الشتا، البول ديال البكرة كيتمثل ليهم بشير خير... ومن بعدها، كا تتدخل فاطنة مرت عباس، هازة في يدها مغرفة ديال العود، كتبعد منهم وتلوحها وراها ، والعيالات حاضين المغرفة، ايلا طاحت واكفة الكيفرحو بالميمون الواكف، ويلا طاحت راكدة كيزيدو وتعاودها حتى تجي واكفة... وكايساليوها بالغنا والشطيح، وكتبقى الشتا على مولانا... عبيدات الرمي كانوا كيجيو للدوار مرة مرة، كيبنيو حدا الجامع، ثلاثة الرجالة كوامانجي وطعارجي وبنادري، وثلاثة الشيوخات ماعليهمش حالة الشيوخات ديال العراس، اللباس نويقص، والصوت ما هو صوت، ومع ذلك تايبان ليا الدراري ناشطين ، كل واحد حاتي على قرعتو، حنا الصغار كيخليونا نتفرجو شوية ويجريو علينا، كيبقاو غا الكبار. لابد الصباح تكون دازت شي مضاربة... أما موات الحمير، فكان بوحدو عالالام، كيجي هو وحمارو، الحمار قصيور، ومفاهم هو وياه، كنتجمعو عليه، وكيبدا يهضر معنا ومع الحمار، يكول ليه موت يموت، يكول ليه نوض ينوض... كان كيبان ليا الحمار تاهو كيفهم، وشي مرات ما كيتجاوبش معه ، وتايكول لينا: كلت ليكم راه غير حمار... الرداد كان كيشد في اولاد الدوار، كيكول ليهم على رقبتى ايلا حمار موات الحمير كيفهم عليكم






الدُّنْيَا جَمَلٌ عَشَارِي  
مَرْبِيَّةٌ مُوَكَّارِي  
عَاطِيهَا لَلدُّمِيرُ  
مَا عَارَفَ أَشْنُ طَارِي  
مَحْرَفِينُو بَرْدَعَةَ  
وَزَادُوهُ الشُّوَارِي

## نوسطالجيا بلدية:29

نهار السوق غير نتفكرو كتجيني فني في ريحة الشفنج، كان حالة خاصة، إيلا كان الوالد غادي بشي ثور ولا حولي ولا بقرة يبيعهم، كينوض في الفجر قبل يدوز الكاميو ديال علال، كان متخصص في هزان البهايم ديال عباد الله ، يديهم للسوق ويرجع لي شري شي حاجة، داكشي علاش كانوا الناس في البلاد تاكولو على لي مكيتصرفش مزيان "بكر علال"، كان كيونس الوالد شي واحد من الدراري الكبار، يبقى معه حتى يجي الكاميو، يطلعو البهيمه عاد يركب هو والوالد في الكار لي كان يمشي لسبت اولاد بوعزيز، كنعقل عليه كان عندو قمقوم زايد الكدام بحال التمساح، فاش داوه للمسيرة تكولا في الطريق، عاد ولاو شي كيران اخرين، كيوصل الوالد للسوق كيتسنى الكاميو حيتاش كيبقى يهز في البهايم، وفاش يوصل ينزل البهايم ويتخلص، وكل واحد يدخل بهيمتو للرحبة، وقبل مايدخلها يخلص عليها في الباب، يبيعهها، ويخبي الفلوس مزيان على الشفارة، عاد يمشي للقهوة ، يعني الكيطون لي كي عمر البرارد ديال أتا، كيفطرو بالشفنج ولا بالخبز، وفاش يطلع النهار، يدخلو لرحبة الخضرة يعمر الكفة ، ويشريو لحيمات لينا، ولحيمات لنسابنا وللدرية اختي لي مزوجة حدانا في الدوار، حيتاش العادة كان لي باع بهيمه كيلحم للناس القراب ليه، والفول والحمص، وحلوة الدمليج وفانيد المكانة، ويجمع كلشي في الكفة، ويشري لا خاصو شي طوالات للبهايم ولا شداد ولا شطابة ديال الدوم للبيوت، أما المراح كانت مي تشطبو غير بالكلكاز. وفاش يرجع كيلقاني في جنب الشانطي واكف نتسنى بحمارتي، غاينزل يعطيني الفانيد، كي عرفني تسنيت بزاف، وكيركب هو على الحمار، وتبعو أنا والدري لي مشى معه. كنوصلو كنعلقو الما طايب ، كتعمر الوالدة أتا، كيحطو الفول والحمص في الطبك، والشفنج بارد في طبسيل، وخبز غليظ ديال السوق، وكتنصب الفاخر وتصاوب لينا القطبان، الوالد كل ساعة كييان ليا كيتملس فجيوبو، وخا دخل للخيمة ماثايش، حيتاش فايت داروها به الشفارة، ضربو ليه الجيب بزيزوارة، وداو ليه الحصيصة. وفي الليل كتنصب الوالدة الكميلة، وفاش تبغي تحط لينا العشا كتذوق كاع الجيران، شي حاطة ليه في طبسيل ، شي في جبانية، المهم كلشي يبقى بخاطرو. خويا الصغير كينعس قبل العشا، ولا بد الوالدة تفيقو ، ويلا مابغاش كندير ليه شنتيفة في فمو كتخافو يتهاوش...

## نوساطالجيا بلدية:30

معرفتاش علاش كلشي الدوار كان كيفرح 51اشك بيان الدور ديال الطلبة في الجامع، مع العلم أن الطالب ذاك الساعة كان كيصلي غا بوحده... أكيد على قبل الماكلة: نهار الدور هو النهار الوحيد لي كايبقى الكسكسو غا شايط. فاش يكونو الطلبة جايين كلشي كيصبح خدام ، شي يبني في الخزانة كدام الجامع، شي يشطب في جناب الجامع، شي يسكي الما من البير، شي يفرش الحصاير والهياضر للطلبة، وفاش يقربو يجيو، كيشعل الطالب عود الند، ويطلق التبخيرة من المبيخرة، كيوجدو الطيسان للغسيل، والفوطات للمسيح، والمرشة عامرة بالزهر، وحناء الدراري كنعبو وحاضين فوقاش يجيو الطلبة. كانوا كيجيو من طريق بياضة، داكشي علاش كنا كنعباو حاضين ذيك الجهة. كان منظر زوين ومهيب 51اشك بيان الوفد ديال الطلبة جاي، هازين علام ابيض كيرمز للدور بحال ايلا هازين الشعلة الأولمبية، كدامهم كبير الطلبة، وكلهم تقريبا ثلاثين طالب ومحضار راكبين على بغال وحمير، وجايين بحال السربة ديال التبوريدة... كيوصلو ، كلشي كيبيغي يقدم الخدمات، عباس كيشد للفقيه الكبير من رجلي حتى ينزل، الاخرين كيربطو البغال والحمير... تيدخلو للخزانة ، يتسارحو ويبدأو يقرأو في القرآن، كيخرجو السلكة، على حقاش كايباتو عندنا، زوج طلبة كيشدو الصينية وتايعمرو أتاي، كيتسخر عليهم سويلم. وهكذا كيبقاو مرة يقرأو ومرة يشربو أتاي حتى تطيب الماكلة. واحد شوية كايبانو ليا الكصاعي جايينهم في الشبكات ديال الجراف، كل كصعة يا كصعة عامرة بالكسكسو واللحم ، والخضرة ولا المعسلة ومزوقينها بالفانيد ديال المكانة والبيض البلدي . وفاش كيتجمعو الكصاع، كيعطيو للطلبة ياكلو، وحتى ناس الدوار ، وكيعطو علينا حنا الصغار يفرقونا على الرباعات... هذا هو النهار ديال الشبعة، كيكون بحال شي عيد ، حتى البهايم ما كيخرجو همش باش يحضرو للدور... الطلبة فاش كيقرأو كيديرو الفاتحة للناس، كل واحد كيدعيو معه على كد فلوسو، كيجمعو حصيصة كيعطيوها للفقيه الكبير يقسمها عليهم فاش يساليو... الصباح يفطرو ويركبو على بهايهم ويشدو الطريق لشي دوار آخر... كانوا ملي يجيو لشي دوار يصيفطو شي حد يعلم الدوار الآخر حتى كايساليو الدور...الحاصل خير كثير ديال القرآن، وديال الماكلة، وديال الريحة الزوينة لي كتبقى في الدوار وفي نيوفنا مور الدور...



كانتُ تُدورُ  
طاخنةُ الدُّكيكِ  
ومُخليةُ العُشورِ  
طاخنةُ الخنّةِ  
ومُخليةُ الحُروزِ

## نوسطالجيا بلدية:31

ففقولنا حنا، كانوا الخماسة في القبيلة قلال بزاف، كنت كنعرف خماس واحد كان عند الحاج الفاطمي، كيسرح ليه النعاج، ومن العام للعام يدي الخمس. لكن كانوا الرباعة بتشديد البنا، وهادو كيكونو مالين الأرض في المدينة في الغالب، تا يعطيهم البلاد والكسيبة، ويديرو معهم الرباعة، ثلاثة لمول الشبي والرابعة للرباع... وكانوا شي وحدين كيشدو البهايم بالمال، يعني كيجيدو راس المال ويقسمو الرباح، وكاين لي كيشد البلاد بالنص، وكاين لي يحرث بالخبزة... ولد عم الوالد كان ساكن في الدار البيضاء، كانت عندو البلاد في الدوار، كان كيبيع ويشري في الخضرة، عندو مكازة كبيرة، هو الوحيد لي كان عاطينا البلاد حنا وعمتي وعمتي الاخرى، بلا مايشد من عندنا لا نص لا ريال لا زوج. كان لاباس عليه، كيجي عندنا من العام للعام، كيجيبو طاكسي كورسة، كيجيب لنا صندوق ديال الخضرة مخلطة واللحم والفواكه، وعماتي كل وحدة صندوق، كيدوز عندنا شي عشريام عاد يمشي، بقى هكاك حتى مات الله يرحمو... الناس كانت قانعة، شحال ما حرثتي ديال البلاد، وشحال ماكثر الزرع كيديروه في المطامر ويلا باعوه كاع جهدهم يشريوه بهائم... كان تفكيرهم حدو الدوار، ما كان حتى واحد كيدير الخضرة في البور، كنا نزرعو الشعير والفرينة والقمح والذرة وشي كرضة كنديروها فول، كان الوالد هو لي كيوضع الخريطة ديال الزريع: لي كانت شعير يردوها ذرة، ولي كانت ذرة يردوها شعير، وبعض المرات يدير الشعير، ياكلوه البهايم كلاس، ويكلبها ذرة مازوزي. وكل عام كيخلي شي بقعة زنيكة، باش يكبر فيها الربيع للبهائم، كيدور بها خط بالمحراث، باش يعرفوها زنيكة، ومايقاوش يسرحو فيها. حيتاش ذاك الوقت، من بعد الحصاد كان كلشي يسرح بهايمو في الحصاد المجردة، وكيقاوا سارحين حتى لدار الحرث، فاش يتعلمو الزنايك، ويتحرثو البلادات عاد يربطو البهايم، ويلا خرجوهم يطولوهم، ويلا بغاو يديوهم للبير يوردو لابد من الكمايم باش ماياكلوش زرع الجيران ... هاذ الوقتة ديال الحرث هي لي كيرخاص فيها الدجاج البلدي، حيتاش كلشي كيبيع دجاجو، باش مايجبدش ليه الصداع مع الجيران: الدجاج خطير في الهبيش، كيكلع الحبوب ديال الزريعة، وكياكل الوليدات ديال النبات...

## نوسطالجيا بلدية:32

الحجام هو لي كان يجي للدوار يطهر الدراري، والطهارة كانوا يديرو ليها عرس، بالليل الطلبة، وبالنهاري العيالات، بحال العرس ديال الزواج، وشي مرات كيشركو زواج وطهارة، المهم كيعلمو الحجام ولد لالة حليلة الله يرحمو، وكيجدد معهم الوقت، الصباح بكري كيصبح كلشي يتسنى فيه، وحنا الدراري حاضين جهة الطريق المنجورة، خويا الصغير ماعارف والو، ملبسينو فوقية بيضة وطربوش اخضر فيه نجمة، محنين ليه يديه ورجليه، وملبسينو لينا الموطور ديال بلغة صفراء، ومي لابسة ملحاف ابيض، والعيالات يصبرو فيها... كيبان الحجام دار، كنشدوها بالجرية باش نعلموهم، كيوقف موطور ياماها، كيجبد الشكارة من الموزيط لي لاصق في ظهر الموطور، وكيسلمو عليه الناس، كيدورو بيه الدراري، مايدخل حتى يفرق عليهم الحلوى، وتايكول للجماعة، هاذو كلهم اوليداتي... كيدخل يوجد راسو، كيجيبو ليه خويا هازينو، كيحطوه في كصعة، يشدو ليه يديه ورجليه، والعيالات كيضربو بالطعارج، ومي دايرينها الوسط وحاطة رجليها في قسرية، ماعرفتش علاش، يمكن باش ماتسمع والو، ومع ذلك شفنها كتتر عد كلها، كيسالي الحجام، كيبقي الدراري بيكي، وكيبداو يسكتوه بالفلوس، أما الحجام، كيجمع الدوزان ويتخلص، ويزيدوه فروج كبير وكيمشي في حالو... من غير الحجام، عمر شي طبيب ماجا عندنا للدوار، لي مرض كيبقي ناعس تايصح، وكيبقاو عليه بالعشوب، ايلا سخانة يعطيوه المخينة ويديرو ليه العركة، ويلا الكرش يعطيوه الكامون، ويلا برد يشربوه الزعتر، وفاش يطوال المرض، كيجيو يزوروه العيالات، وكل وحدة تفتي ري، كايين لي تكول راه فيه مسلمين ديوه زوروه، كايين لي تكول خاصكم تسببو ليه عند سي المكي، يدو بحال رحمة الله... كان معروف عندنا كل ضريح لاش يصلح: سيدي اسعيد يليق للحلاقم، سيدي عتات يليق للتالول، سيدي بوشعيب البوهالي يليق لي ضاربينو المسلمين، سيدي مسعود بن حسين يليق للحماق... وكانوا الناس بداكشي لي زرع فيهم الاستعمار بسبب الجهل، كيقدموا الأضرحة، وكيطفو بمولاي عبد الله أمغار وغيرو... وفاش يتلف المريض، كيكولو لاهلو سيرو عند الشوافة تكول ليكم مالو لا يكون مسحور... من غير هادشي كان الجبار كيجبر الناس في السوق، وكايين لي يكوي ليهم على بوزلوم، وكايين لي يداوي البهق ويحد التالول... وكايين لي يكلع الضراس في الكيطون... وسير وسير... شحال د الناس مرضو وبقاو ناعسين في الخيمة حتى ماتوا، مولا عام مولا عامين... ويلا جبدو ليهم الطبيب كيتخلعو... حيثاش ذاك الوقت كان لي فتح يعني دار عملية في الغالب كيموت، وكان لي جا تحت المقص كيشهد...

هدهدي

كَالُوا عَلَيْهَا رَحَى

تُطْحَنُ الزُّرْعُ

وَتُطْحَنُ الْمَلْحَةُ

فَ زَمَانُ الشُّرْعِ

وَزَمَانُ الْفَرْحَةِ

### نوسطالجيا بلدية:33

يمكن نوع الماكلة والخدمة في الفلاحة والنية... كانوا كيعاونو ناس العروبية باش يقاومو بزاف ديال الحوايج: البرد، الحرارة، المرض، تمارة... بزاف ديال الناس سلكو من بوحمرون والعواية وبوصفير وخبيث... بلا طبيب، وكاين لي وفي أجلهم ومشاو عند الله. الطاهر الله يرحمو كان صحيح، فين ما كانت الخدمة الصعبة يعيطو ليه: يحفر توفري، يريب سطار، يكلع سد دبال الضرك، ينقي البلاد من شو كاحمار... لكن حنا صغار كان كيعجبنا نتفرجو فيه وهو كيشنتف على العباين، كان كيصبنهم بتيغشت قبل ما يعود المسحوق، كان عندو شتيف خاص، كيبدا دقة دقة، وفاش يسخن كيبدا ينفخ ويكول اشنتف... اشنتف... اشنتف... وشي واحد كيكب ليه على رجليه بالدلو حتى يسالي عاد ينشرهم... كان الرداد كيكول عليه: الطاهر عندو رقصة الشتيف... فوق هادشي الطاهر كان كلشي كيبغيه، يتسخر في الفرخ وفي القرخ، وراسو صغير... والناس فاش كيبغيو يعبرو البلاد كيعيطو عليه، كان يعرف مزيان للعبار، راسو كيكولو عليه خفيف، ولي ما بغاش يتفهم ليا، هو كيفاش كان كيعرف الما فين كاين تحت الارض، كيعيطو عليه فاش بداو شي ناس يحفرو البيار، يجيب معه فركة من فرع شجرة، ويشدها بيديه بزوج ويبقى يدور حتى يلقي الماء، ويكول ليهم غا تحفرو هنا، وفعلا كيصيبو الماء....



## نوسطالجيا بلدية:34

العيالات في الدوار كانوا يتصارفو بكلشي، أي حاجة يطلبوها من عند بعضياتهم، الماعن، العطرية، السكر، اتاي، الزيت، الملح، السواك، الكحل، حوايج اللبوس ايلا كان شي خرجه، العباين ايلا كان الزايد في الخيمة... والرجالا كذلك كيتصارفو بكلشي، الزريعة ولا التبن ولا القشبييل حتى للوقت، والوقت هو الحصاد ، وكيتصارفو بالمحراث والكرابة والمشطة والبرويطة والمذرة والراطو والمنجل والعنلة والفاس والكادومة والدلو والبوطات ... حتى حد ما يضرك شي حاجة على حد، وكيتصارفو بالحمير حاشاكم على قبال الروا ... وكاين لي يتسلف بهيمة يمشي عليها للسوق... كانوا كيتعاونوا باش يكملو العام والسيمانة والنهار...أما الشهورا ماكان كيحسبهم غير الطالب ديال الجامع و كيحسبوهم العيالات الحاملات، باش يعرفو فوقاش يولدو، كانت الشهور كتحسبها مي فشي شكل: شعبان ورمضان و الفطور والفطور والعيد الكبير وعيشور وشا عيشور والميلود وشع الميلود وجاد وجماد ورجب... هكا كانت ديما تسميهم. العيالات كانوا عارفات كل وحدة امتى غاتولد، هاذي كتوحم، هاذي في شهرها، هاذي شهرها قرب يخرج ومازال ما ولدت... وكيفرحو بأي زيادة في الدوار... وكيف ما كيتصارفو بالمواد كيتصارفو بالزرورة والغرامة في العراسات والسكر في الزيارات والمناسبات... التضامن كان وحتى الحساب كان....




الأعدال ايلا مآل  
يُمكِن البوطة كُنسِين  
وَالحَال ايلا مآل  
يُمكِن مِّن هآذ الجِيل

## نوسطالجيا بلدية:35

حتى ذلك الوقت كانوا الشفارة كيهدفو مرة مرة، بالليل ماشي بنهار بحال شي شفارة بالسواطر والماس في هاذ ليام. كانوا كيضربو الثقب، يعني كيجيو للحايط المبني بالحجر والتراب، يشدو كريفاديال الحديد، وكيكلعو بالحجرة بالحجرة، حتى يديرو منين يدخلو ويخرجو، ويشفرو الدجاج والماعن وأي حاجة لقاوها... الوالد كان كيكول، مايشفرك غير لي يعرفك، تاكون داخل للخيمة وعارف ولا معاود ليه شي حد... حنا فعقولي، تشفرنا شي ثلاثة وشي مرة مشات صينية المرات، كاتصبح الكشينة مثقوبة والدجاج لي في الدهليز ماكاينش، وطاس، والمرة الثالثة فاق بهم الوالد، هربو وخلاو الدجاج في خنشة... من ذيك الساعة الوالد مشى دبر على كلب كبير كيربطو على ظهر الكشينة، وطلع زوج كلاب فوق البيوت، عاد تفرقو علينا. الحاجة الزوينة، كانوا الناس يسمعوها الصباح، كييداو يجيو عندنا يخلفو لينا، يعني تايكولو لينا مولانا يخلف، وكيجيبو معهم قوالب ديال السكر. الوالد عمرو ما اعلم جدارمية، حيثاش مكانش يقدر يشك فشي حد، وجدارمية ايلا بداو يبحثو غايديو كاع الرجالة والشبان للبحث، داكشي علاش كان يكول، اللهم نصبر ولا ندي ذنوب الأبرياء... وزيدون الدوار كان كلو كيجينا، هالعمام ها الخوال ها النساب... كلشي فاميلة حيد غا صويلح لي جا من قبيلة اخرى هو واوادو، كان لونهم اكحل، كان خدام عند الباشا حمو، وفاش مات الباشا سكن عندنا في الدوار... فاش كبرنا شوية، سمعت الدراري عند الجامع كيدويو على الشفارة، وكينعنو في شي وحدين ما تتخيرهم غاهوما في الغلظ... الحاصلو الله يسمح ليهم....


## نوسطالجيا بلدية:36

فين ما ذكرنا العروبية كندكرو الحرث، والحرث كان شي حاجة مهمة عند الفلاحة، كيبدا مع حلان الزريعة، غير تروى الارض وتشبع ما، ويبدأو الناس في الدوار كيوجدو في العدة ديال الحرث، ويدبروا على البهايم لي غا يحرثوا عليهم، يعني الزويجة، وفي الغالب كتكون الزويجة إما زوج بغال، ولا زوج حمير ولي مالقاش كيربط بغل مع حمار ولا حمار مع ثور وشي مرات حتى بقرة... أهم حاجة في الزويجة هي خاصها تكون لي على اليمين تشد الخط ماتبدلهاش ... كنعقل مزيان والاخرى تتبعها، الوالد كان كيكول: الزويجة ايلا كانت حارثة على شي صباحات كنا بدينا فيهم الحرث، كانت الارض ساردة، فاقت الوالدة مشات للكشينة توجد خبزة المحراث، والوالد شد المذراة وصار يشنت في مازير لي كان محطوط كفاف في البلاد، كانت ريحة مازير كتوصلنا من بعيد، وكثير شي ريحة الرماد، وريحة الدخان من جهة الكشينة، فاش سرح مازير، خرجنا العدة ديال الحرث، المحراث زير ليها السكة، والكفيات ديال البهايم زوج، والكران لي يجمع ليهم روسهم، والعكاس لي يعكس راس البهايم باش يدورو هك ولا هك، وعمودا بطون لي يدوز من تحت كروش البهايم، وتشد فيه الكفيات وتربط فيه المحراث... وقبل ما يكول بسم الله في الحرث، كتجيب مي الطبك، فيه خبزة المحراث، كيحضروا معنا الجيران، كتقسمها طرف صغار بزاف، وكتعطي لكل واحد شوية، وكاتكول لينا الله يجعل البركة في الغلة والله يجعلو عام زين، وفي الحقيقة كل مشروك مبروك من عند الله... الحرث الاول كيكون زريع الشعير كلاس للبهايم في الكرضات لي حدا الخيمة، داكشي علاش الوالد كيتحرف خيشة فيها الشعير وكيشنت الزرع قبل الحرث، كانت خطواتو مكادة، والزريع مكاد مع المشية، غير يسالي يربط الزويجة، ويحتي علر المحراث في يد والعكاس والزلاط في اليد اليسرى، ويكول بسم الله، يعلم المطيرة، يكملها ويدوز للاخرى، حتى يسالي ويعيد... وكيستمر الحرث حتى كيسالي كلشي، الكليب، والتثنية، والتزوريك، والتبينينج، والتكراب والمشيط... كيتساراح فاش كنجيبو ليه الماكلة، عاد يريح ويدير العلافة في راس البهايم... وكان الحرث كيشد مدة ديال ليام...وكيكون على مراحل مفرقة، فيه البكري وفيه المازوزي...



## نوسطالجيا بلدية:37

أكبر حدث من بعد الحرث كان هو الحصاد... ماكانوش الماكينات حصاد ودراس، كان غير المنجل، فاش كيشهاب الزرع، كيبدا الوالد يوجد في المناجل باش نحصدو، كيدي المناجل القدام للسوق يمضيهم، وكيشري ايلا خاص شي واحد جديد. وكيوحد خناشي يصاوب بيهم التباندة، لي كيلبسوها الحصادة باش مايكرفصوش حوايجهم، وكيصاوب الوالد الصبايعات لي كيديروها الحصادة في الصبع الصغير وبوخاتم باش مايضربوهمش بالمنجل. بكري كانوا الناس الحصادة قلال ، كانوا كيديرو التويزة بيناتهم، يساليو من عند واحد يدوزو عند لآخر حتى يساليو كلشي، فعقولنا حنا، كبروا الشبان والدريات، كل خيمة تلقى فيها 6 حتى 12 ولد وبنت، ولي كل واحد يحصد زرعو هو واووادو، ولي ما عندهمش كيتعاونو بيناتهم. وكانوا شي رجالا من الدوار فاش يدخل الحصاد كيمشيو للشاوية يحصدو، كيظهريو ولا يعشويو بالأجرة، كيجمعو فليسات ويرجعو. ما كيجيو حتى يلقاو الناس في الدوار بداو الدراسات. اي واحد كيكونو عندو الحصادة كان كيتهلئ فيهم بالغذا، إما كسكسو وإما صيكوك ، وإما خبز واتاي، كل نهار ورزقو... الحصاد بالمنجل ماكانش ساهل، حيثاش النهار كامل والحصاد محني كيتكزر من ظهورو، غير هو مرة مرة فاش يحصد تيوقف باش يربط الغمارة، ويحطها في الحصيدة، وكيتساراحو فاش كيكملو الخرجة ويرجعو يشدو خرجة اخرى، وكانوا شي وحدين كيحصدوا ويدندنوا بشي مايات ، حنا الصغار، كان با يعيط علينا نجمعو الغمار في المطة، وكيبقى في الحصيدة تايساليو عاد يجيب الناكة ديال عمتي صفية، وكينكل الزرع في الجراف الكبير، كان كيعجبي نركب على ظهر الناكة فاش نفرغو الغمار ونكونو راجعين للحصيدة، فاش نكملو التتكال كيكون النادر ولي كبير حدا الكاعة، وكنخليوه يتشمش مزيان قبل ما يجي الدراسات....



وَكَاثُتُ الْخَلَاوَةِ كَاثَةٌ

بِفَانِيذِ الْمَكَائَةِ

وَكَانَ سُوقُنَا دُوقُنَا

فَ الرِّحْبَةُ لَا كَانَا

## نوسطالجيا بلدية:38

الكسيبة في العروبية شي حاجة ضرورية، ماعدا لي ما صاب جهد، كانوا يكسبو البكرات باش يولدو العجول والعجلات، ويعطيو الحليب لي منو اللبن والزبدة والسمن الحار، لي كانوا العيالات كيملحوه وديروه في الطاس تا يحيل... وكانوا مع البكرات كيربطو ثور يعلفوه حتى يسمن ويديوه للسوق، يبيعهو ويشريو من فلو سو عجل صغير يربطوه تاهو... وتايكسبو ناكة ولا جمل باش ينكلو عليه الزرع والتبن والقشيبيل ، وتايكسبو بغل للحرث ولا للكرويلة، وتايكسبو الحمير للدمير، في الحرث، في الدراس، في المركوب، في السكي ديال الماء، في هزان الزرع للطاحونة... وتايكسبو الغنم يبيعو اولادها ويعيدو منها ويستافدو من الصوفة وقت الدزازة، وكاين لي كان عندو عود للتبوريدة في الموسم... وتايكسبو الدجاج والبيبي والوز والبط وحتى القوري، منهم كينهلوا في الضيفان وكيدبحو منهم مرة مرة ، وكستافدو من البيض ، شي ياكلوه وشي يبيعهو... الكسيبة كتبغي الخدمة النهار كامل، اربط، سيب، طؤل، وكّل، ورّد، اسرح، كيد، شكّل، انكس... كلشي كيضرب تمارة عيالات ورجالة ودراري... كانوا البهايم عزاز علينا، كنولفوهم، لدرجة كنت كنبكي على بهيمة ايلا تباعت وانا صغير... وفاش كتشوفني مي كنبكي، كتسلق ليا بيضة، وكتكول ليا، خوذ الخروف ديالي احسن من هذالك راه شرف....



## نوسطالجيا بلدية:39

كانت اول مرة نشوف وانا صغير، واحد مريض في اللحظات الأخيرة ديالو في الحياة، كان عمي شقيق الوالد، ساكنين بزوج في خيمة جدي الله يرحمو، وفاش بغاو يفرقو الكوانن، الوالد شد البيت التحتاني ، سد ليه بابو، وفتح ليه باب قبلة، ودور بيه الحلقة مبنية بالحجر والغيس. كان عمي ما بقاش يهضر من شهر تقريبا، ومابقاش ياكل، كان وجهو اصفر وفمو محلول، والوالد كيقتل ليه الما بليكة ديال الصوف مغسولة مزيان... الناس يدخلو ويخرجو، كييان عليهم الخوف من الموت، حنا الصغار كنحضيو الوجوه، وفاش نحسو بالخوف، كنخرجو، مع الخرجة تبعنا الوالد، عند الباب كنسمعو كال للفقيه ديال الجامع: عافاك ادخل، وعرف كيفاش تكول للعيالات راه خويا الله يرحمو... دقيقة من بعد، كان صوت العيالات واصل لقرن الدوار، وبدوا الناس يتجمعو، يعزيو في الوالد وفي خوتو واخواتاتو... كانت شي طقوس غريبة، العيالات كيبيكو ويندبو في حناكهم، وملي جات النياحة سخن الطرح، وبدأت تعدد وتنوح، داكشي بحال شي اهازيج حزينة، كتخلي كلشي ينحط... سيفطو شي حد للمدينة على حمار، وبنوا خزانة، وبقاو يتسناو حتى جا الكفن والحنوط، عاد دخل الفقيه وغسلو، كان المرفع والغسالة ديما في الجامع، وفاش كمل الفقيه، خرجوه وقرأو عليه السلكة، يعني الطلبة كيقسمو بيناتهم القرآن كل واحد خمسة الاحزاب ولا اكثر حسب العدد، وهكذا كيقرأو ستين حزب... من بعد هزوه في المرفع، والعيالات والو واش ردو لساناتهم لفامهم...وتبعوه الرجالة للروضة، وجرأو علينا حنا الصغار ما خلاوناش نمشيو. فاش رجعو من الروضة كانوا الجيران جابوا الطعام، في نفس الليلة دارو ليه النعي، وقرأو الطلبة وتفرتكو الناس، وبقاو العزاية كييجيو مرة مرة...الناس كانوا كيتعاطفو مع بعضياتهم في كلشي، في الفرحة وفي القرح، لكن في الموت كنت كنشوف كلشي حزين بحال ايلا الميت ديال كلشي...وكيبقاو العيالات يعاودو للعزاية على اللحظات الاخيرة ديال الموت، حتى كنوليو حنا الصغار حافظين اش غايكولو... وفاش كترجع السمطة اللور، كييان ليا بلي الناس القدام كاع مشاو تقريبا فين نمشيو كاملين، الله يرحم القبر وما خلى....

## نوسطالجيا بلدية:40

ما كانوش اللُّعب في ذاك الوقت ، وحتى ايلا شراو لينا شي حاجة في عيشورا ماكانتش تفوت شهرها، لكن كنا كناصايبو اللّعب لراسنا، كنا نقلبو على حجيرات مقادين خمسة، باش نلعبو القيوش، وكانت البلاصة كتكون زينة ايلا لعبناهم في التراب... وكنا نجمعو الشققات خاويات ديال الببوش لي مات، وكنتناقرو بهم، وحدة تنقب الاخرى، ولي تنقبت ببوشتو يخسر... وكنت كناصايب دراجة ، الروايد بالضرك ، واللوريب بكصبة رقيقة، كنتنقب كصبة غليظة في الجناوب، ونحبسهم من الراس على جهتين، وحدة نخشي فيها اللوريب، وندير فيه الروايد بعود، والجهة الاخرى ندير فيها ضركة على شكل بولة باس نسوك... وكنا نمثلو التبوريدة راكبين على كصبة، ولي داز من الكبار يكول لينا مبارك العود... واللّعبة لي كانت كتعجبنا فاش تكون صابة الشتا هي فاش كنمشيو نجيبو الطين الاصفر ولا بياضة، وكنعجنوه ونصوبو بيه طباسل وجبانيات وكيسان وغيرهم، وكنبنيو خيمة بالحجر، ونلعبو بيتات... في الربيع، فاش يكبر الشعير ويكون باقي فتي، كناصايبو الزوايات، وشي دراري كانوا يصايبو كمنجة ديال الطارو، وسببب من شعر العود، وكايسابو ليها الحكاك، وتايغنيو بها، ولد علال كانت عزيزة عليه الليرة، كيسميها العوادة، يصايبها من كصبة كارمة... وكانت عندنا واحد الرويدة منصولة ديال برويطة كنا نلعبو بها أنا وخويا، كنشدها من وذيها وندرجوها وحننا محنيين، كانت لعبة خطيرة ، شحال من مرة تتركبنا. وفاش كنا نبغيو نلعبو الكرة، كنا نجمعو الشراوط ونحزموهم، والدريات كانوا تايصايبو العروسات بالرشق والشراوط ، وكينيو بيتات، الشبان الكبار كنا نتفرجو فيهم لاعبين هيري، كيدخل واحد، كيحط رجل وسط القاعة وعندو الحق يضرب برجل وحدة، والاخرين يحضيوه حتى يتلافت ويضربوه، كانوا كياكلو العصا مزيان، ولي مسوا برجلو يدخل ليها... هادشي زيد عليه العاب كثيرة بحال الغميضة والحبل والبي والطرومبية وبليدة يعني السيس، وغيرها ... الألعاب كان عنها ذوق خاص، وخا كانوا الكبار ماكيغيوناش نلعبو بزاف...

# تأكيده

الدُّنْيَا تَأْكِيْدَةُ رَأْسِهَا مُعْكَوْسٌ  
خَاصَّتْهَا زُغُوْاطُ مَا شِيْ مُنْحَوْسٌ  
يُعَيِّرُ الدَّرْسَةَ وَيُصَفِّي الْمَدْسُوْسَ


## نوسطالجيا بلدية 41

فعقولي أنا، قليل شي حد لي كان مدخل بنتو للمدرسة، وحتى الدراري ما كانوش يدخلو كلشي، وخا كانوا الأدوات قلال، وكاين المطعم والمدرسة قريبة... كانوا كيكولو: امرأة بسعد رجل... يعني شحال مابقات غنتزوج ، وكل فولة عندها كيال. غير كتبدا البنت تكبر ماكتبقاش امها تخليها تلعب معنا، وكتولي تديها معها للعراسات، ويلا مشات تسكي تدير الزيف والشد. الوالدة وعيالات الدوار كانوا تلبسو الجلابة ويديرو نكاب كحل، حتى كتكبر المرأة، عاد كتعيد النكاب، وتبدلو بالعكاز... كانت مي صفية حتى شرفت كاع، فاش يدوز شي رجل تجر الشد على وجهها . وكانت البنت ايلا بلغت كتبدا تقلد العيالات في كلشي، وتبدا امها تعلمها الطياب والغزيل والمنجج وتولي تقابل خوتها الصغار، تصبن ليهم وتعمهم وتبدل ليهم، وفين ما مشات امها كتدوي عليها: عويشة عندي جات حاذكة تبارك الله كلشي تديرو، وداكشي كان إشهار ضمني. حيتاش ذاك الوقت الاولاد فاش كيبيغيو يتزوجو، ما كيتلاقوش مع البنت، كلشي كتديرو الام، هي لي تختار، هي لي تشكر، هي لي تتفق مع أم العروسة على كلشي، الدرري ولدها، جهدو يسولها كيف دايرة، كتوصفها ليه، وشي مرات قبل ما يوافق على الزواج كتبقى تشكر ليه فشي وحدة، باش نهار يزعم يقبل بها. كيخطبو وكيديو التفكير في الاعياد، وكيديرو العرس، والعريس باقي ماعرف رمانتو كي غا تخرج....

## نوساطالجيا بلدية:42

البنات في دوارنا ماكانوش يدخلوهم للمدرسة إلا قليل ، كانوا الاقسام عامرين بالدراري، الناس تاكولو: امراة بسعد رجل، يعني غنتزوج غنتزوج، وتمشي عند رجلها وما يستافدو منها والو، داكشي علاش شي خوت الله يعفو عليهم كانوا في الورث يعطيوهم غا الشايطة، وكاين لي يجمعو ويطويو معهم... البنات غا كتبدا تبان شوية، كتمنعها امها ماتبقاش تلعب معنا، ويلا خرجت كتدير الزيف تتحكك به، ماكتبقاش مشعككة، وكتبدا تعلمها تعجن وتصبن وتطيب وتجمع الخيمة وتقابل خوتها ايلا غابت، وتعلمها تنتف الصوفة من البطانة وتغسلها وتنشفها في السكني وتغزلها بالمغزل الكبير وتغزل السدا بالمغزلة ، وفاش يكون المنجج تعلمها تتج... بحرية بنت جارتنا فاطنة كانت شي عامين قبل كتلعب معنا بيتات وعروسة وعريس، واحد النهار مع المغرب، الوالد والوالدة سالوا من التمراش، غسلو وبدلو حوايجهم، ودخلوا عند جارتنا الهجالة، اختي الكبيرة هي لي كالت ليا راه شي ناس جابين يدويو في بحرية، ضرني راسي ماخلاونيش نمشي معهم، المهم ماتعانتقتش، غير بانوا ليا الناس جاو وانا ندخل معهم، بغات مي تجري عليا، وهي تكول ليها فاطنة والله مايمشي، شديت القنينة وبقيت حاضي آش غا يطرا، عمرني ماحضرت لداكشي. جابوا الصينية عمروا اتاي، كالوا المرققة والسفة ديال السميد مدردرة بالسكر والقرفة... ودواو على الفلاحة على الحرارة على الغلا في السوق على البهايم على القبيلة على الفقيه ديال الجامع على موت العربي ولد دامية على مصيطيفي لي دعا خوه في القليمية.... وفي الاخير سكتو، وهي تنقر الام لي باغا تخطب لولدها، كالت لرجلها: ودوي اسمحمد... وهو يتجمع وكال: إيوا أسي عبسلام(خو فاطنة) راحنا جينا طالبين ضيف الله، خاطبين راغبين في يد بنتكم بحرية لولدنا... الجيلاي، وعودها زوج مرات اخرين

جاوبو عبسلام، مرحبا أسيدي وميات الف مرحبا، هذاك ولدنا وهذي بنتنا، والله يسخر. الطريك مواطية بكري، هادشي لي حسيت به. نقرت مي كالت ليهم إيوا اتفقوا على الصداق وعلى كلشي، جاوبها بو العريس، غانديرو بحال كاع القبيلة، غانعطيوكم عشرين الف وعشرين تبقى في الكاغيط، والذبيحة علينا، وهادشي لي تسالونا، بنتكم مايتخصها تا خير. فاطنة عارفة الدردي خدام مع بوه في الفلاحة، وغايسكن معهم ، بناو ليه بيت في المراح التحتاني... زغرنت اخت مي فاطنة، وقرأو الفاتحة... كالت ليهم أم العريس، هاذ الخميس لا والخميس لآخر نجيبو ليكم الخطبة، والعرس نشاعلله حتى يفوت الحصاد... فاش سولت مي فاطنة على الكتبة، كال ليها بو العريس، وايلي أفاطنة واش حنا بيناتنا الكواغط، شوف لكاين شي معقول، حتى يكونو مسالين ونديوهم للسوق عند سي العربي العدول.... تفرتكت الجماعة ، رجعت للخيمة خايف، الساعة مادوا معايا حد، ومشيت لبلاصتي ننتسلت، بقت كنشم في يديا ريحة السفة....



الْفَخُّ الْمَسْدُودُ  
مَا يَشُدُّ الْفَرْخَ الْمُنْكَودُ  
غَيْرُ أَيَّلَا كَانَ جِيعَانُ  
وَعَيْنُو فِي الدُّودُ

## نوسطالجيا بلدية: 43

الاحتفالات في عروبيتنا كانت بسيطة بزاف، ولايني حنا كانت كتبان لينا شي حاجة كداش، نهار الخطبة، عبسلام خو فاطنة جارتنا جاب ليها خروفة، بدات مسكينة كتبكي، مات الرجل وخلي ليها 4 لوليدات. دارت عند الجيران، جمعت طباسل كبار، وميادي، وصواني وكيسان، وحصاير ولعابن للفراش، وجابت المقراج الكبير ... الخطبة ماشي هي العرس، عرضت غير على خوتها واخواتاتها وعمام الدرية وخوالها، والجيران، ولي ماصابت منو مقالا، على برا حدا ... ودارت بحساب اهل العريس حتى هوما غايجبوا معهم شي ثمانية ولا عشرة الفرينة ديال الخبز، حطوا ثلاثة المناصب، وجابوا الكدرة ديال النحاس نصبوا فيها الماكلة، كانت جارتهم عبوش هي لي كتكابل الطياب، وكيعونوها العيالات ... حنا الصغار كان كيبيطا علينا وقتاش يجبو اهل العريس، كنبقاو حاضين حتى يبانو لينا جابين: ثلاثة العيالات كيتقدمو لكدام، هازين ثلاثة الطبوكا، واحد فيه ثلاثة القوالب ديال السكر عريانين، وواحد فيه الحنة والتمر، وواحد فيه شي تفصيلة وشربيل... ومورا هم شي خمسة العيالات كيضربو بالطعارج ويغنيو... خرج عبسلام يستقبل الرجالة، وكال للعيالات وهو يضحك: هادي راه عا خطبة، خليو الغنا والشطيح حتى للعرس، ولايني العيالات ماتسوقوهش، باغات يفرحو والسلام، مشاو الرجالة دخلو للقبعة، وبقاو العيالات في المراح يتفرجو مع بعضياتهم... دخل الفقيه ديال الجامع وهوما يسكتو، قرا شي بركة، حتى فار الطعام وسكاو، عاد حطوا ليهم الماكلة، كالوا وشربوا وعاولد الفقيه قرا سورة الفاتحة، ودار الفاتحة يعني الدعاء... كانوا الرجالة كينوضو بالواحد بالواحد يعطيوه الفلوس وهو يدعي معهم ومع والديهم... هادشي كلو، والمخطوبة جالسة في البيت مع صحاباتها تضحكو ويلعبو، أما العريس باقا بلاصتو ماكايناش...


## نوسطالجيا بلدية:44

أنا محرف بشكوة ونكول الذبان منين جاني... هادشي لي كان يكول عمي لولدو، فاش كيحول عليه فشي حاجة ومايدير هاش... ولدو كان نشايطي، فين ماسمع الشيوخات فشي دوار، كيحتي على يترو ويلحك عليهم، كان خدام شيفور مع شي شركة وتايروح لخيمتهم، عمي كان كيكمي ، وحتى ولدو خرج ليه، كانوا مفاهمين على واحد اللعية، كيشري الدرري باكية ديال كوبا ونبيرو غلافو احمر، حاطينهم في واحد التافة، لي داز فيهم يعمر، كيغلفو منها بزوج كانوا الناس كيتعانندو بحال الخنشة ديال النخالة. عمي كان باغيه يتزوج بحال ولد جيرانهم، في الزواج والاولاد حتى غرقوها... عاد ولى الفرملو كيدور في الدواور يفرق في الفنيدي. ولد عمي من نهار سمع خطبة بحرية وهو فين ما يتلاكي مع فاطنة امها يسولها على العرس... عينو غا في النشاط. وكان كيقلب على صحابو من الدوار، ويباتو مع القمارا حتى للفجر. نهار جا المقدم يقيد الناس لي باغين يمسيو للمسيرة، ماكالهاش لبوه وقيد راسو، ونهار بغاو يمسيو حتى على حوايجو في صاك وتوادع معهم، وفاش رجع بقى فين ما يبرك مع الدراري الكبار حدا الجامع كيچبد لكارط ديال المسيرة كيوريها لينا، وكندوزوها من واحد لواحد، بيضا وفيها خط احمر وخط اخضر، وكبيدا يعاود لينا، كان هو الشاف ديال الكاميو رقم 314 إقليم الجديدة، كانو معه 24 زيد عليهم الشيفور. كيعاود لينا كيفاش كانوا كيغرفوا عليهم المونة، وكيفاش كانوا يعجنوا ويطيبيوا في الخلا، وشحال من طبيعة شافو... وكانوا ديما ناشطين مع بعضياتهم حتى وصلو، كايين لي مرض وكايين لي مات... وهو رجع وبقات الذكريات مع الكاميو فورد والهببية... عمي ولى ديما يشكر المسيرة، حيتاش غا رجع ولدو وكال ليهم شوفو ليا شي بنت الناس... خطبوا ليه حتى هو، والعرس نشاعله كالوا غايكون بعد الحصاد....



## نوسطالجيا بلدية: 45

قبل العرس بسيمانة ، كتعيط أم العروسة على فاطمة البراحة، وكتطلب منها تعرض ليها على العيالات للعرس، هاذ الجولة كتأخذ منها وقت كبير، حيثاش فاطمة معروفة ومحبوبة عند الناس كلهم، والخيمة لي مشات ليها خاصها نص نهار، نص ساعة وهي تسلم، السلام عند العيالات في العروبية طويل، كيتشادو مايتفاكو، ومن بعد يبقاو يسولو على النقطة والفاصلة، ومن بعد عاد تدخل فاطمة يديرو ليها أتاى، وتبقى تتحدث مع مولات الدار، وتعطيها اخبارات العرس كيفاش غايكون... وفوق هادشي كيدورو معها بالبياض... في نفس السيمانة، مولات العرس كتكون مشغولة بالدهاز ديال بنتها، وشريان داكشي لي خاص، خنشة سميد ضرورية، على ود العراسات بكري كان فيهم غا الطعام باللحم، ولا الدجاج، وخنشة ديال الفاخر للفريضة، ومطيشة والبصلة والعطرية... وداكشي لي خاص باش يزينو العروسة من حنة وسواك وعر وكر وكحل... وكتكون مشغولة بجميع الماعن، الميادي والصواني والكيسان والبرارد والمقارج والحصاير لي يفرشو في الخزانة... بو العروسة فاش يتقضى لي خاص هو ومرتو، كيعيط على ثلاثة ولا ربعة ديال الدراري كبار من الدوار، كل واحد يجيب معه عدال، وكيبداو يسكيو، ويعمرو البرامل ما . كنت كنحس في العرس بلي كاع الناس كتتحرك بحال ايلا العرس ديال كلشي، كل واحد اش يدير، لي ينصب الخزانة، ولي يكاد المناصب والحفرة ديال الفريضة، ولي يكابل المقارج تايطيبو، ولي يتسخر على الطبايلية ولي مكابل الدراري ليكطعو قناب الوثاق، ولي مكابل البوطات ديال الضو، ... ليلة العرس عند العروسة، ماكانش كيكون العريس، فقط العيالات كيلبسوها وزينوها ويغنيو ويشطحو... بالليل، كا تجي الفريضة ديال الموتشو، كيجيبهم ولد حيمود مول سيمكا، ومعهم عزوز المديني، كانوا يعيطو ليه المديني، حيثاش كان كيخدم في كازا، وكايجي للدوار، كايبقى يفوح على كرانو، كانوا كيشدو فيه حدا الجامع، وهو غا يضحك، وليلة العرس، كيعركها روج، وكيشطح مع الشيوخات. الخزانة كتعمر بالرجالة والدراري، والعيالات كيطلو من بعيد، كيبانو فيهم غا العينين. كان فذاك الوقت، منظر فريد، فاش كيبدا الموتشو يساوي، والشيوخات كيتساماو بربعة، ووراهم الطعارجي والبنائديري، وكان كلشي كيدوز مزيان، وخا الصباح، كتصبح الخزانة عامرة بالمكلوبين من الشبان لي كيكثرو من الراج... كيخليوهم ناعسين حتى كتضرب فيهم الشمس ويفيقو... والغد ليه مع العصر، كيبدا الاحتفال ديال العيالات، طامو كتترجم الغنايات، وكيبقاو يغنيو على العروسة وعلى العريس وعلى هذا وعلى ذلك، حتى كيجمعو حصيصة. ومن بعد كتبدا فاطمة البراحة في الغرامة، كتفتح الحنة، وكيبداو العيالات يرميو وهي تردد: كتسمعي آفاطنة، هانا من عند بنت عمك مباركة، كتغرم عليك ميتين ريال، هي الله يخلف عليها وانت بصحتك... هانا من عند الشعبوية بنت علال، كاتكول ليك عذريها راها ما عندهاش، كتغرم عليك خمسين ريال، هي الله يخلف.... عليها وانت بصحتك... يساليو، يحطو الماكلة ويتقرتكو حتى الغد ليه عند دار العريس



دَخَلْنَا كُرْأَانَةَ وَخُرْجْنَا كُرْأَانَةَ

حُرْمَةَ الْعَزِيزِ مُولَانَا

وَاللَّهُ حَتَّى فَرَحْتُ أَنَا

فَأَشْنُ هَذَا الْوَعْدُ لَا كَانَا

فَ لَمَّةُ الْأَحْبَابِ

وَالْمُعْزَلِ جُؤَالِ

مَعَ ضَرْبِ الْفَالِ

## نوسطالجيا بلدية:46

الغد ليه عند خيمة العريس، كلشي موجود، والعريس كيمشي للحمام هو والوزير ديالو، وغالبا الوزير كايكون صاحبو او كرينو، فاش يرجعو ويستراحو، كيبردعو ليهم زوج بغال، كيركب مولاي السلطان والوزير، وكيديعو في الدواور يعرضو على الناس، وحتى هوما كيعطيوهم البياض، ملي يرجعو كيجلسو مع الناس في الخزانة، حتى يظلام الحال، عاد العروسة كتجيبها شي وحدة على غفلة، كاتدوزها من شي طريق مضركة، كانوا يخافو من الديار يعني السحر، مع المغرب كينزل الموتشو والشيخات، كيبداو بالعيطة، والطعيرجات الصغار... العريس كينتسل وكيدخل عند العروسة، وتماك كتكون امو ولا اختو واكفة عند باب البيت، والعيالات كيحملو الطرح بالطعارج باش مايسمعو والو، اهل العروسة كلهم كايحيو ماعدا بوها كيبقى في خيمتو سهران وحاضي الكسبية... كيخرج العريس، وكتدخل أم العروسة عندها... رويئة صافي: على برا الشيخات، وفي المراح العيالات بالطعارج، وفي القبة الطلبة... المهم فاش يدوز الليل شوية، كيدفعو العريس، يعني كيدخلوه الطلبة وهوما يصلبو على النبي، وكدام الباب الشبان كيوقفو على جهتين وفي يديهم كصبات، كيتصاقرو بها، وفي غفلة كيتحدر العريس ويدخل يجري، وكاين شي مرة تجي فيه الضربة... كيبقى داخل، والطلبة يبركو يقرأو عند الباب، كتجيب ليهم أم العريس طبك فيه المسمن والبيض مسلوق والتمر... وكيديرو الفاتحة للي عطاهم الفلوس، وكيعطيوه من الطبك الباروك... كيسكتو الشيخات حتى تدوز الغرامة، لي كيديرها البراح وهو هاز فردة ديال بلغة جديدة كيجمع فيها فلوس القرجوطة، عاد يفرقو الماكلة، وموراها العيالات كيخرجو السروال... وتايدورو به يغنيو ويشطحو: هاهو تاع الفجر... هاهو باقي اخضر... الخ... والناس كيشوفو الدليل بلي الدرية عزبا، وكيحطو فلوس في الصينية... هاذيك الفلوس كتاخذاها العروسة... وكايمشيو العيالات بالسروال حتى لعند بوها، كيلكاهو ناعس وفايق حدا جنب الكاعة، كيجبد ورقة كبيرة ديال الفلوس وكيغرمها على بنتو وهو فرحان... مع قربات الفجر، كيكون النص في الكيطون نعس ولا ناض مشى، والشيخات كيديرو مايات ثقيلة يجيبو بها الصباح...

## نوسطالجيا بلدية: 47

الخرزانة لي داز فيها العرس، مبنية كدام الخيمة، فوق التراب، كاع لي كانوا حاضرين كبيركوا فوك الحساير، وبلاصة الشيخ واصحابو، ومولاي السلطان هي لي كانوا مفرشين فيها لعبانات فوك الحساير... حتى الماكلة تاياكلو فوك الميادي جالسين على الحساير، ويلا مابقاوش الميادي كيحطو ليهم في طبك فوك الارض، وكلشي ناشط... العيالات في المراح كذلك ومثال، جالسات على الحساير، ولاسات تحتية ودفينة ولا سمية قفطان ودفينة، داكشي ... والماكياج مافايتش الكحل والسواك وشي وحدينات طاليات عكر من المطلية بسيط و عندو قيمتو، حيتاش كلشي فرحان من الداخل... يسف الله يرحمو كان شطاح، وكانوا العيالات الكبار كيجروه وسط المراح، ويضربو ليه وهو يشطح، كان عندو شطيح ثور الغيس، كيضحكو على شطيحو اكثر من أي حاجة اخرى... الناس كانت كتخلق الفرحة من والو، وكتخلق الفرحة من القليل... يسف ماكانش يجلس فشي عرس، كان كلشي عارفو تاكابل المقارج، ويتسخر على الصواني، ويفرق اتاي على الضيفان، وهو يدور، كيزرع البسمة على الوجوه، كان عندو صوت قوي وثقيل فاش يسلم الكاس لشي واحد، كايكول: هانا وهانا، كويس على الكانة، الله يرحم من لا كانا... العز ليا ثاني، ولنعاغ جناني، ولسي احمد قايد الصواني.... وكتسمع الخزانة كلها تفركت بالضحكة، وهو يكمل الدورة بالكيسان... ويكول : هانا مولاي السلطان، الخديجات حميرين بلعمان، يموتو بالسم العديان... يتفرتك العرس، وبعد سبع ايام يرجعو اهليات العروسة يعوموها، ويزوروا مرة مرة، على حقاش ماكترجع لدارهم حتى يدور العام، عاد كتجيب دخول الخيمة، كيحتافلو بها في دارهم، وبالمناسبة بوها كيعطياها بهيمة من البهايم، إما عجلة ولا عجل ولا نعجة ولا خروف على... حسب الاستطاعة، ومن تماك كيولي عندها الحق تزور خيمتهم ومن عامها الاول خاصها تحمل، قبل مايبداو العيالات يسولو، وحدة تكول زوروا ووحدة تكول خاصها كصعة الكديدة، ووحدة تكول ياكما عاكرة... وهادشي كان كيجبد الصداغ، شي مرات كنت نشوف المرأة هازا صرة على راسها وغادية لخيمتهم كنعرفها غضبانة، وتماك كتبدا التدخلات ديال الكبار، والجيران، وشي مرات حتى الفقيه ديال الجامع ايلا كانت شي... خصومة كبيرة... الطلاق كان عيب بزاف وخا حلال، كانت الناس كتصالح بعضياتها

جرمنا

كَانَ زُعَوَانُنَا بُرْكَي

وَالرَّيْحُ كَانَ شَرْكِي

وَالدُّرْسَةُ صَافِيَةٌ بَلَّارُ

## نوسطالجيا بلدية:48

مايمكنش يسالي العرس، يسالي التعاويد، بلا ماندوي على شي رموز وعلامات برزت في دوارنا ومشات، لكن يمكن كاع الناس لي مازال عايشين ماقدروش ينساوهم: خناتة لي كان لونها كحل غري، ولي كانت خدامة في دار الباشا حمو، ولي جات سكنت حدانا في خيمة مهجورة، بعدما تشاورت مع ماليها لي هاجروا للجديدة من زمان، كانت امرأة كبيرة في السن، كتعطف علينا حنا الصغار، فين مانجي انا ومي تجبد صريرة من شمارها وتعطيني ريال ابيض كبير، الريال ذيك الساعة كان يشري خمسة الفنيدات، أو خمسة البيات بونيكس، أو نجيبو طحميرة من الحانوت شي مرات... كانوا عندها بناتها خدامات في المدينة في الديور، وكايجيو عندها مرة مرة... عمر الهبيل، لي كان مجلخ ووجهو يخلع، كنا نخافو منو فاش يسرح بهايهم حدا بهايمننا، ماكانش يظلم شي حد، ولايني كا يكون بارك عاتينوض يطلع فوك الكدية ويتدرب حتى للنص ويطيح ويبقى يتمرغ ويغوت، حتى حد فينا مايقدر يقرب ليه، واحد الصباح سمعنا بلي داوه لسيدي مسعود بن حسين، وطج بالليل وطاح في بير... ولد القزبري لي كان ديما هريان على امراتو وولادو، والناس تاكولو شادو بن يفو، كان شي مرات كايجي للدوار، كيبان عادي، كتدوز شي ايامات ويكولو راه مشى، تاحد ماكان عارف السر، هو تاكول فاش كيمشي للسيد كيصح وفاش يجي لدارو مايقاش يعس، واحد النهار جات مراتو عند مي، بقات تعاود تعاود تعاود، مي مافهمت والو، ولايني وخا كنت صغير عرفت علاش ولد القزبري كان طاج... لالة ميمونة لي كانت حوش، دايرين بها قبورا، وحداها توفري كانوا يشدو فيه المساجين في ايام السبية، ولي كانوا العيالات يزوروا ويحطو عند راسها الشمع، صبحت واحد النهار محفورة وبقي في الارض الأثر ديال صندوق، وكلشي كال بلي الفقها سرقوا الخزنة... والشجرة لي ما بحالها حتى شجرة كانت وسط الدوار، سماوها الاولين سيد البابين، وداروها فقير يزوروه، مابان عيها حتى جاعت البهايم في الجفاف وكالت ليها الورك، عاد ولاو القمارا يقمر وتحتها... الحاصول شلا علامات كانت طرف من حياتنا وحياة الناس في ذلك الوقت، وعزيب القايد امحمد لي كان شاد النص في الدوار، ياويل البقرة لي تدخل ليه، كيشدها الخماس يحبسها حتى يجي ولد... القايد، عاد يشوف اش غا يدير مع ماليها

جابوا العبار يعبر لكاهما سينع و صخر

فاض قسمها بالشبر

وزاد خلفه بحالو ماشاه ليه والو

مخلى ليهم كاعة صبر وشواري كلو غدر

## نوسطالجيا بلدية:49

فاش بديت نكبر، ووليت نقرا في الداخلية، كنت نرجع للدوار من العطلة للعطلة، وكانت عطلة الصيف طويلة، ثلث اشهر، كندوزوها تمراش ودراس ودكان الذرة وخزين الزرع في المطامر... كنت بديت المحاولات الاولى ديالي في كتابة مايشبه الشعر... كنت كنفصل نبات على برا، كدام الخيمة، الجو كان دافي وهاديء، خصوصا فاش كتكون الكمرة، ذاك الجو كان كيخليني نفكر بزاف في جمال الكون، في السما العامرة بالنجوم، في الأرض الهازة ثقل كثير، كنت حاس بلي الناس كلهم عزاز عليا. ماكانوش في دوارنا أغنياء، لي كان فايت لآخر فايتو ببكرة ولا زوج، بخدام تاع الارض ولا زوج. الكرم والضرك كلشي تياكل منهم، الحصيد كلشي يسرح فيهم، العراس كلشي يحضر، يفرح ، يخدم ، كان الدوار فضاءنا المحدود لي ماعدو حدود، بلادنا وبلاد الجدود...

دوارنا كان قريب من الطريك المنجورة لي غادية لمراكش، عمر ناس الدوار ماينساو القسمة لي دار العبار لبلاد عيسى القرشي، اولادو كلهم بغاو حقهم على الطريق، ناض قسمها ليهم شرطي ماتصلح لا لفلاحة ولا لبني... من ذاك النهار، حسيت بلي وجه الدوار مابقاش كيف... كان، وتزادوا شلا خيام، وشلا وجوه، وشلا قسامات...



## نوسطالجيا بلدية:50

بدا الغول يغوت: واهالينة، راني نتصرف ليك ف صفة زيف...

جاوباتو: مانديروش

كال ليها نتصرف ليك دبليج

جاوباتو: مانهزوش

كال ليها نتصرف ليك مجدول

جاوباتو: مانتحزمش به

كال ليها نتصرف ليك طير من الطيور

كالت ليه مانقربش ليه

...كال ليها : واهالينة ايلا لكيتي الطيور مضاربين لا تفكيهم لا تفكيهم

هذا غير مقطع صغير، باقى الحجاية طويلة، كيف كان جدي الله يرحمو يحكيها ليها تقريبا كل ليلة وحنا صغار. يساليها ويحكي ليها حكاية بريغتان برجال... وحكاية القرع بيض الراس وحكاية حديدان... وحا حفظناهم، كان كيغجبنا نسمعوهم منو، كان عندو صوت زوين وحنين... تايجي وحنا خيالنا سارح بعيد، وهو متكي على الحايط، ومرة مرة يهز راسو فاش الحنش لي عايش في السقف ديال العمدة والتابية بيذا يخرشش، وفاش كيحس بنا تخلعنا، تايجول ليها راه غير حنيش التراب املس مايععضش... وكانت خاطر متيسعة بحر، فين ماسولناه على شي حاجة يلقي ليها الجواب. فاش كيشد من لحيته، كيبيدا يفكر، وفاش نشوفو شدها بصبعانو كنعرفو غايدوي، كنت كنحضيه مزيان، كيرمش بزاف وهو يعاود، ومرة مرة يطرطق صباعو... كنت كنسولو على بريغتان واش باقي حي ولا مات، كييجول لي : واش لي طاح في البير مايعرفش يعوم غايطلع؟ وكنسولو واش الحيوانات كتدوي مع بعضياتها، كييجول لي لا، راه هادي غير حجاية. تفكرت نهار شرينا أول راديو، كنت كنطل من البوق واش كاين شي حد فيه... ما تسرطتش ليا السلوكا يدويو... العجب! وشحال حكي ليها جدي من مغربات، وشحال حكي ليها الوالد من بعدو، وشحال حكات الوالدة وعمتي وحي عامر وغيرهم، كلهم حكاو ليها وحنا صغار على عام البون، وعلى عام الجراد، وعلى حفير يرني، وعلى دخول فرنسا، وعلى خروج الاستعمار، وعلى العساكرية لي مشاو لاندوشين، وعلى زلزال اكادير، وعلى شلال اعوام وسنين... وفاش كان يتقاضوا حكايات مي على الماضي، كانت تحكي ليها على المستقبل، وكانت تكول ليا، غادي تكبر وتدير الاولاد حتى انت، وتخدم وتولي معلم تقري الدراري، ويا عالم كيف غاتكون ايامكم، وبقاو كلهم يحكيو يحكيو يحكيو، حتى دانا النعاس، وفاش فقط، لكيتهم ماتوا، وماتوا من وراهم قومان، ولكيت راسي شاب، واطفاري كبرو، ولحيتي طوالت، ولكيت راسي كنحكي ليكم نوسطالجيا بلدية...

النهاية

